

宋

史

七
四



列傳卷第四

宋史二百四十五

開府儀同三司上柱國錄軍國事尚書右丞相修國史領經筵事都總裁唐肱等奉
勅修

宗室二

漢王元佐

昭成太子元僖

商王元份

越王元傑

鎮王元偓

楚王元偁

周王元儼

悼獻太子

濮王允讓

太宗九子長楚王元佐次昭成太子元僖次真宗次

商恭靖王元份次越文惠王元傑次鎮恭懿王元偓

次楚恭惠王元偁次周恭肅王元儼次崇王元億

漢恭憲王元佐字惟吉初名德崇母元德皇后少聰
警貌類太宗帝鍾愛之年十三從獵近郊兔走乘輿
前太宗使元佐射一發而中契丹使在側驚異之從
征太原幽薊太平興國中出居內東門別第拜檢校
太傅同中書門下平章事封衛王赴上于中書後徙
居東宮改賜今名加檢校太尉進封楚王初秦王廷
美遷涪陵元佐獨申救之廷美死元佐遂發狂至以
小過操挺刃傷侍人雍熙二年疾少間帝喜為赦天
下重陽日內宴元佐疾新愈不與諸王宴歸暮過元
佐第曰若等侍上宴我獨不與是棄我也遂發忿被

酒夜縱火焚宮詔遣御史捕元佐詣中書劾問廢為庶人均州安置宰相宋琪率百官三上表請留元佐京師行至黃山召還廢居南宮使者守護諮議趙齊王通翊善戴元頓首請罪帝赦之曰是子朕教之猶不悛汝等安能輔導耶真宗即位起為左金吾衛上將軍復封楚王聽養疾不朝再加檢校太師右衛上將軍元佐生日真宗賜以寶帶平居不接人事而事或預知帝嘗遣術士管歸真為醮禳左右未及白元佐遽曰管歸真至矣帝聞之曰豈非為物所憑乎封泰山真拜太傅祀汾陰遷太尉兼中書令又加太師

尚書令兼中書令遂拜天策上將軍興元牧賜劔履
上殿詔書不名時禁中火元佐表停奉稟助完宮闕
不許加兼雍州牧仁宗為皇太子兼興元牧仁宗即
位兼江陵牧薨年六十二贈河中鳳翔牧追封齊王
謚恭憲宗室子弟特給假七日以鹵簿鼓吹導至永
安陪塋永熙陵明道二年改封潞王又改魏王子三
人允升允言允成神宗封王後以允言子宗說恭憲
王長孫嗣封祈國公皇祐中坐帷薄不修除名又坐
坑殺女僕鎖閉宮室外宅其子仲旻官右武衛大將
軍道州刺史後因朝叩頭殿下泣訴云父老且病願

納身官以贖神宗亦愍之而未俞其請出就馬氣塞
不能言及家而卒贈同州觀察使馮翊侯宗說幽死
熙寧三年以允升子宗惠襲封魏國公中書言宗惠
不應封以恭憲庶長孫允言子宗立嗣宗立從張揆
學春秋大清樓侍宴預坐悉賦裸玉詩宗立詩先成
仁宗稱善屢賜飛白書旌其文雅至是襲封終武寧
軍節度觀察留後贈昭信軍節度使同中書門下平
章事南康郡王子仲來嗣終金州刺史子不儻嗣徽
宗立改封魏王為漢王不儻卒子彥清乞襲父爵奉
漢王祀詔從之允升字吉先初免乳養明德太后宮

太后親撫視之元佐有疾允升始出第真宗賜名元
中授右監門衛將軍更賜今名累遷澶州觀察使封
延安郡公進武寧軍節度觀察留後歷安德建雄安
國軍節度使景祐二年卒贈太尉平陽郡王謚懿恭
子十三人宗禮宗旦宗悌宗惠知名宗禮嘗侍宴大
清樓仁宗賦詩命屬和侍射苑中復獻詩終虔州觀
察使成國公贈安遠軍節度使同中書門下平章事
韓國公子仲翹仲髦宗旦字子文七歲如成人選為
仁宗伴讀帝即位獲超選為群從所詆上書言狀帝
曰宗旦陪朕幼學勤勞居多此出朕意豈應訴以常

格所生母死請別擇塋域歲時奠祀後遂著為法治
平中同知大宗正事神宗即位拜崇信軍節度使同
中書門下平章事為太宗正賜方團金帶非朝會得
乘肩輿元豐三年封華陰郡王加開府儀同三司長
屬疾十六年宗子有過優游誨導一善必以開異時
赴朝請者率以私丁給侍宗旦建請始得從官給薨
贈太尉滕王謚恭孝聽旗節印綬從葬宗悌字元發
輕財好施故相王氏子持父所服帶求質錢宗悌惻
然曰宰相子亦至是乎歸帶而與之錢所親用詐取
藏鏹得其狀曰吾不以小故傷骨肉恩竟不問所生

母早世宗悌不識也聞父婢語平生輒掩泣繼得其
肖貌繪而奉之如生終明州觀察使贈保寧軍節度
使同中書門下平章事東陽郡王謚曰孝憲宗惠封
魏國公尋以旁支黜終武昌軍節度觀察留後江夏
郡王贈郟王允言累官左屯衛將軍嘗託疾不朝降
太子左衛率府率歲中復官又坐笞侍婢而兄允升
勸止悖慢無禮貶副率絕朝謁出之別第以祀汾陰
恩復率府率還宮久之復朝謁歷左監門衛大將軍
黃州刺史天聖七年卒贈明州觀察使奉化侯明道
二年贈安遠軍節度使追封密國公子宗說宗正事

並見上宗育終右屯衛將軍贈潁州防禦使汝陰侯
允成終右神武將軍濮州防禦使贈安化軍節度使
郇國公明道二年加贈鎮江軍節度使兼侍中子宗
顏宗訥宗鼎宗嚴宗魯宗儒宗奭皆為環衛刺史

昭成太子元僖初名德明太平興國七年出閣授檢
校太保同平章事封廣平郡王與兄衛王德崇同日
受封八年進封陳王改名元佑詔自今宰相班宜在
親王上宰相宋琪李昉請遵舊制不允宋琪等懇請
久之上曰宰相之任實總百揆與群司禮絕藩邸之
設止奉朝請而已元佐等尚幼欲其知謙損之道卿

等無固讓也雍熙二年元佐被疾以元僖為開封尹
兼侍中改今名進封許王加中書令上為娶隰州團
練使李謙溥女為夫人因謂宰相曰朕嘗語諸子今
姻偶皆將相大臣之家六禮具備得不自重乎溥化
元年宰相呂蒙正復上言乞班諸王下詔不允三年
十一月己亥元僖早入朝方坐殿廬中覺體中不佳
徑歸府車駕遽臨視疾已亟上呼之猶能應少頃遂
薨上哭之慟廢朝五日贈皇太子謚恭孝元僖姿貌
雄毅沈靜寡言尹京五年政事無失及薨上追念不
已悲泣達旦不寐作思亡子詩示近臣未幾人有言

元僖為嬖妾張氏所惑張頗專恣捶婢僕有至死者而元僖不知張又於都城西佛寺招菟塋其父母僭差踰制上怒遣昭宣使王繼恩驗問張縊死左右親吏悉決杖傳免毀張氏父母塚墓親屬皆配流開封府判官右諫議大夫呂端推官職方員外郎陳載並坐裨贊有失端黜為衛尉少卿載為殿中侍御史許王府諮議工部郎中趙令圖侍講庫部員外郎閻象並坐輔道無狀削兩任免詔傳冊禮以一品鹵簿塋真宗即位始詔中外稱太子之號焉乾興初改謚無子仁宗時詔以允成子宗保出後昭成太子為孫宗

保生二歲母抱以入見章獻后后留與慶宗保七歲授左侍禁帝親為巾其首久之歸本官詔朔望出入禁省累官代州防禦使襲封燕國公性仁恕主歲更盜米至千斛貫不問嘗書忍字於座右以為戒熙寧七年卒神宗臨奠其子仲鞠泣曰先臣幼養宮中終身不自言帝感悼遂優贈靜難軍節度使新平郡王謚恭靜仲鞠亦好學能詩事親居喪以孝聞宗保卒子仲恕嗣官至忠州團練使謚純僖子士孟嗣

商恭靖王元份初名德嚴太平興國八年出閤改名元俊拜同平章事封冀王雍熙三年改今名加兼侍

中威武軍節度使進封越王淳化中兼領建寧軍改鎮寧海鎮東真宗即位加中書令徙鎮永興鳳翔改王雍永熙復土為山陵使拜太傅真宗北征為東京留守薨年三十七贈太師尚書令鄆王改陳王又改潤王治平中封魯王元份寬厚言動中禮標望偉如娶宗儀使李漢斌之女李悍妬慘酷宮中女婢小不如意必加鞭杖或致死上每有恩賜詔令均給李盡取之及元份卧病上親臨問見左右無侍者因輟宮人為主湯劑初太宗崩戚里皆赴禁中朝晡臨李多稱疾不至元份生日李以衣服器用為壽皆飾以龍

鳳居元份喪無戚容而有謗上之語上盡知其所為以元份故優容之及是復不欲顯究其罪狀止削國封置之別所元份子三人長允寧次允懷政允中早卒次則濮王允讓也允讓薨以允寧子宗諤襲虢國公至熙寧三年以宗肅嗣封魯國公宗肅亦允寧子也子仲先嗣徽宗即位改封魯王為商王詔曰宗室諸王追封大國其世襲子孫尚仍舊國甚未稱正名之意如魯王改封商王其子尚襲魯國之類其令大宗正司改正制以寧遠軍節度使魯國公仲先改封商國公允寧字德之性至孝因父感疾恍惚失常既

而嗜學尤喜讀唐史通知近朝典故工虞世南楷法
真宗賜詩激賞之又善射嘗侍射後苑屢破的賜金
帶器幣初授右千牛衛將軍四遷右武衛歷唐州團
練潁州防禦同州觀察使進彰信軍節度觀察留後
武定軍節度使景祐元年卒贈太尉信安郡王謚僖
簡子宗諤宗敏宗孟宗肅宗諤封虢國公官累集慶
軍節度使同中書門下平章事進封豫章郡王乞比
外使相給奉仁宗以非兼侍中令詰主吏宗諤上章
自陳於是御史張商英劾其招權立威等罪坐落平
章事英宗即位還所奪元豐五年薨贈太尉韓王太

常謚榮孝上省集議駁之改榮恭僕射王珪復駁之
遂謚榮恩宗肅封魯國公兄宗諤嘗亡寶器意宗肅
家人子竊之宗肅曰吾廉不足取信兄弟如此乎立
償其直宗諤愧不取乃施諸僧久之器得宗肅不復
言元豐五年終安化軍留後以嘗從英宗入慶寧優
贈鎮海軍節度使開府儀同三司北海郡王宗敏終
右千牛衛大將軍文州刺史贈越州觀察使會稽侯
頗涉書傳緣郊恩建請封所生母范氏宗室子得封
所生母自宗敏始

越文惠王元傑字明哲初名德和太平興國八年出

閣改名授檢校太保同平章事封益王端拱初加兼
侍中成都尹劔南東西川節度淳化中徙封吳王領
揚潤大都督府長史淮南鎮江軍節度使至道二年
改揚州大都督淮南忠正軍節度真宗即位授檢校
太尉兼中書令徐州大都督武寧泰寧等軍節度使
改封兗王咸平中再郊祀皆為終獻加守太保六年
七月暴薨年三十二元傑穎悟好學善屬詞工草隸
飛白建樓貯書二萬卷及為亭榭遊息之所嘗作假
山既成置酒召僚屬觀之翊善姚坦獨頽首不視元
傑強之坦曰坦見血山安得假山言州縣鞭撻徼民

以取租稅假山實租稅所為耳語見姪坦傳中及薨
真宗聞之震悼不俟旦步及中禁門乃乘輦臨視哀
動左右廢朝五日贈太尉尚書令追封安王謚文惠
後改邢王後改陳王無子仁宗以恭憲王之孫允言
子宗望為之後宗望字子國終右武衛大將軍舒州
防禦使贈安化軍節度使觀察留後高密郡公仁宗
嘗御延和殿試宗子書以宗望為第一又常獻所為
文賜國子監書及以塗金紋羅御書好學樂善四字
賜之即所居建御書閣帝為題其榜子仲卽嗣熙寧
三年與商恭靖王孫宗肅等同日封陳國公官至陳

州觀察使卒謚良僖子士闡嗣父卒徒行護喪數百里路人嗟惻卒贈陳州觀察使徽宗即位改封陳王為越王

鎮恭懿王元偓字希道端拱元年出閣授檢校太保左衛上將軍封徐國公至道二年拜洪州都督鎮南軍節度使真宗即位加同平章事封彭城郡王俄加檢校太傅改鎮靜難彰化進封寧王郊祀東封悉為亞獻禮成授檢校太尉兼侍中護國鎮國等軍節度三年文武官詣闕請祠后土元偓以領節帥亦奏章以請詔許之將行命為河華管内橋道頓遞使明年

車駕入境元偓奏方物酒餼金帛茗藥為貢儀物甚盛至河中與判府陳堯叟分導乘輿度蒲津橋上登鄧丘亭目元偓曰橋道頓置嚴難之力也元偓頓首謝及還加中書令領成德安國等軍節度改封相王五年加守太傅真宗自即位以來屢以學術勛宗子元偓首冠藩戚益自修勵上每製篇什必令屬和一日謂宰相曰朕每戒宗子作詩習射如聞頗精習將臨觀焉因幸元偓邸第宴從官宮僚畢會賦七言詩元偓奉觴上壽賜襲衣金帶噐幣緡錢又與宗室射于西南亭日晡從官退上獨以中官從幸元偓元儼

宮復宴元偃宮如家人禮夜二鼓而罷六年進位太尉八年七月以榮王宮火徙元偃宮於景龍門外車駕臨幸是冬加兼尚書令天禧元年二月換成德鎮寧二鎮進封徐王二年春宮邸遺燼燔舍數區元偃驚悸暴中風眩薨年四十二帝臨哭廢朝五日贈太師尚書令鄧王賜謚恭懿元偃姿表偉異厚重寡言曉音律後改封密王又改王蘇治平中追封韓王子允弼八歲召入禁中令皇子致拜允弼不敢當御樓觀酺得與王子並坐皇子即位是為仁宗允弼累遷武寧軍節度使兼侍中判大宗正事封北海郡王英

宗時拜中書令徙王東平神宗即位拜太保鳳翔雄武軍節度使朝朔望熙寧二年丁母憂悲痛不勝喪固辭起復母塋有日而允弼病篤顧諸子以不得終大事為恨薨帝臨哭之慟輟朝三日贈太師尚書令兼中書令追封相王謚孝定允弼性端重時然後言諸官增學官員允弼已貴猶日至講席延伴讀官讀孟子一節領宗正三十年與濮安懿王共事相友愛為宗屬推敬子宗績襲祖恭懿王封為韓國公卒贈南康郡王謚良諱續弟宗景以相州觀察使同知大宗正事神宗以其父允弼司宗久故復選用之宗景

事母孝居喪如不能勝居第火冒急赴家廟不恤其
他火亦不為害元祐中累遷彰德軍節度開府儀同
三司檢校司空封濟陰郡王宗景喪其夫人將以妾
繼室先出之於外而託為良家女且納焉坐奪開府
既而還之紹聖四年薨年六十六贈太師循王謚曰
思宗績既卒子仲磨嗣自平川節度使徙劔南西川
徽宗改封韓王為鎮王

楚恭惠王元偁字令聞七歲授檢校太保右衛上將
軍涇國公久之領鄂州都督武昌軍節度使真宗即
位加同平章事安定郡王進檢校太傅景德二年郊

祀遷宣德保寧兩鎮進封舒王大中祥符初封泰山
加檢校太尉兼侍中移平江鎮江軍從祀汾陰加兼
中書令改鎮南寧國軍節度使五年拜太保自景德
後每有大事皆為終獻元偁體素羸多病上幸真源
時已被疾懇求扈從至鹿邑疾甚肩輿先歸車駕還
臨問數四七年薨年三十四廢朝五日贈太尉尚書
令追封曹王謚恭惠後改封華王蔡王有集三卷筆
札一卷上為製序藏之秘閣子允則官至右千牛衛
大將軍卒先是諸王子授官即為諸衛將軍餘以父
官及族屬親疎差等天禧元年令宗正卿趙安仁議

為定制安仁請以宣祖太祖太宗孫初廕授將軍魯
孫授右侍禁玄孫授右班殿直內父爵高者聽從高
廕其事緣特旨者不以為例詔中書門下樞密院參
定行之允則無子以平陽懿恭王之子宗達為後熙
寧三年襲封蔡國公鄰家失火盜因為奸竊宗達所
服帶既而得之且知其主名貸不問浚井得鏹復授
之官累武信軍留後薨贈安化軍節度使開府儀同
三司高密郡王子仲約嗣徽宗即位改封蔡王為楚
王

周恭肅王元儼少奇穎太宗特愛之每朝會宴集多

侍左右帝不欲元儼早出宮期以年二十始就封故
宮中稱為二十八太保蓋元儼於兄弟中行第八也
真宗即位授檢校太保左衛上將軍封曹國公明年
為平海軍節度使拜同中書門下平章事加檢校太
傅封廣陵郡王封泰山改昭武安德軍節度使進封
榮王祀汾陰加兼侍中改鎮安靜武信加檢校太尉
祠太清宮加兼中書令坐侍婢縱火延燔禁中奪武
信節降封端王出居故駙馬都尉石保吉第每見帝
痛自引過帝憫憐之尋加鎮海安化軍節度使封彭
王進太保仁宗為皇子加太傅歷橫海永清保平定

國節度陝州大都督改通王涇王仁宗即位拜太尉
尚書令兼中書令徙節鎮安忠武封定王賜贊拜不
名又賜詔書不名天聖七年封鎮王又賜劔履上殿
明道初拜太師換河陽三城武成節度封孟王改永
興鳳翔京兆尹封荆王遷雍州鳳翔牧景祐二年大
封拜宗室授荆南淮王節度大使行荊州揚州牧仍
賜入朝不趨元儼廣顥豐頤嚴毅不可犯天下崇憚
之名聞外夷事母王德妃孝妃每有疾躬侍藥晨夕
盥漱焚香以禱至憂念不食母喪哀戚過人平生寡
嗜慾惟喜聚書好為文詞頗善二王書工飛白仁宗

冲年即位章獻皇后臨朝自以屬尊望重恐為太后所忌深自沉晦因闔門卻絕人事故謬語陽狂不復預朝謁及太后崩仁宗親政益加尊寵凡有請報可必手書謝牘方陝西用兵上所給公用錢歲五十萬以助邊費帝不欲拒之聽入其半嘗問翊善王渙曰元昊平未對曰未也曰如此安用宰相為聞者畏其言慶曆三年冬大雨雪水冰陳楚之地尤甚占者曰憂在大臣既而元儼病甚上憂形于色親至卧内手調藥屏人與語久之所對多忠言賜白金五千兩固辭不受曰臣羸憊且死將重費家國矣帝為嗟泣明

年正月薨贈天策上將軍徐兗二州牧燕王謚恭肅
比塋三臨其喪詔以元儼墨跡及所為詩分賜宰臣
餘藏祕閣子十三人允熙允良允迪允初餘皆早卒
熙寧中以允良子宗絳嗣封吳國公徽宗改封吳王
為周王允熙終右監門衛將軍滁州刺史贈博州防
禦使博平侯允良歷五節度領寧海平江兩軍封華
原郡王改襄陽由同中書門下平章事兼侍中至太
保中書令好酣寢以日為夜由是一官之人皆晝睡
夕興薨贈定王有司以其反易晦明謚曰榮易允迪
累官耀州觀察使居父喪不哀又嘗宮中為優戲為

妻昭國夫人錢氏所告制降右監門衛大將軍絕朝謁錢氏亦度為洞真道士允初初名允宗勤於朝會雖風雨不廢未嘗問財物厚薄惟誦佛書人以為不慧累遷寧國軍節度使同中書門下平章事治平元年卒贈中書令博平郡王無子英宗臨奠以允初後事屬其兄允良乃以允成孫仲連為之後

崇王元億早亡追賜名封代國公治平中封安定郡王徽宗即位加封崇王

真宗六子長溫王禔次悼獻太子祐次昌王祗次信王祉次欽王祈次仁宗禔祗祈皆蚤亡徽宗賜名追

封

悼獻太子祐母曰章穆皇后咸平初封信國公生九年而薨追封周王賜謚悼獻仁宗即位贈太尉中書令明道二年追冊皇太子

仁宗三子長楊王昉次雍王昞次荆王曦皆早亡徽宗時改封

濮安懿王允讓字益之商王元份子也天資渾厚外莊內寬喜愠不見于色始為右千牛衛將軍周王祐薨真宗以綠車旌節迎養于禁中仁宗生用簫韶部樂送還邸官衛州刺史仁宗即位授汝州防禦使累

拜寧江軍節度使上建睦親宅命知大宗正寺宗子
有好學勉進之以善若不率教則勸戒之至不變始
正其罪故人莫不畏服焉慶曆四年封汝南郡王拜
同平章事改判大宗正司嘉祐四年薨年六十五贈
太尉中書令追封濮王謚安懿仁宗在位久無子乃
以王第十三子宗實為皇子仁宗崩皇子即位是為
英宗治平元年宰相韓琦等奏請下有司議濮安懿
王及譙國夫人王氏襄國夫人韓氏仙遊縣君任氏
合行典禮詔須大祥後議之二年乃詔禮官與待制
以上議翰林學士王珪等奏曰謹按儀禮喪服為人

後者傳曰何以三年也受重者必以尊服服之為所
後者之祖父母妻妻之父母昆弟昆弟之子若子謂
皆如親子也又為人後者為其父母傳曰何以期不
二斬持重於大宗降其小宗也為人後者為其昆弟
傳曰何以大功為人後者降其昆弟也先王制禮尊
無二上若恭愛之心分於彼則不得專於此故也是
以秦漢以來帝王有自旁支入承大統者或推尊其
父母以為帝后皆見非當時取議後世臣等不敢引
以為聖朝法况前代入繼者多官車晏駕之後援立
之策或出臣下非如仁宗皇帝年齡未衰深惟宗廟

之重祗承天地之意於宗室衆多之中簡推聖明授以大業陛下親為先帝之子然後繼體承祧先有天下濮安懿王雖於陛下有天性之親顧復之恩然陛下所以負宸端冕富有四海子子孫孫萬世相承皆先帝德也臣等竊以為濮王宜準先朝封贈期親尊屬故事尊以高官大國譙國襄國仙遊並封太夫人攷之古今為宜稱於是中書奏王珪等所議未見詳定濮王當稱何親名與不名珪等議濮安於仁宗為兄於皇帝宜稱皇伯而不名如楚王涇王故事中書又奏禮與令及五服年月敕出繼之子於所繼所生

皆稱父母又漢宣帝光武皆稱父為皇考今珪等議稱漢王為皇伯於典禮未有明據請下尚書省集三省御史臺議奏方議而皇太后手詔詰責執政於是詔曰如聞集議不一權宜罷議令有司博求典故以聞禮官范鎮等又奏漢之稱皇考稱帝稱皇立寢廟序昭穆皆非陛下聖明之所法宜如前議為便自是御史呂誨等彈奏歐陽脩首建邪議韓琦曾公亮趙槩附會不正之罪固請如王珪等議既而內出皇太后手詔曰吾聞群臣議請皇帝封崇漢安懿王至今未見施行吾載閱前史乃知自有故事漢安懿王譙

國夫人王氏襄國夫人韓氏仙遊縣君任氏可令皇
帝稱親濮安懿王稱皇王氏韓氏任氏並稱后事方
施行而英宗即日手詔曰稱親之禮謹遵慈訓追崇
之典豈易克當且欲以塋為園即園立廟俾王子孫
主奉祠事翌日誨等以所論列彈奏不見聽用繳納
御史勅告家居待罪誨等所列大抵以為前詔稱權
罷集議後詔又稱且欲以塋為園即追崇之意未已
英宗命閣門以告還之誨等力辭臺職誨等既出而
濮議亦寢至神宗元豐二年詔以濮安懿王三夫人
可並稱王夫人云王二十八子長宗懿英宗時為宿

州團練使封和國公神宗以宗懿濮安懿王元子追封舒王子仲鸞常州防禦使父薨諸子皆進官獨不忍受喜翰墨樂施與九族稱賢卒贈武康軍節度使洋國公謚曰良仲鸞弟仲汾幼喜書史一讀成誦居父喪鄰於毀瘠卒官萊州防禦使贈昭化軍節度使榮國公次宗樸為隴州防禦使封岐國公宗樸與英宗友愛初詔英宗入居慶寧宮固辭宗樸率近屬敦勸乃入治平中建濮王園廟宗樸遂拜彰德軍節度使封濮國公奉王後神宗即位加同平章事兼侍中進封濮陽郡王薨贈太師中書令追封定王謚僖穆

子仲佺父歿不食者數日母塋時天大雪步泥中扶翼道路歎惻以潤州觀察使卒贈開府儀同三司宗樸既薨宗誼襲封官至昭化軍節度使同中書門下平章事薨贈太師中書令廣陵郡王謚莊孝宗暉元豐中以淮康軍節度使襲濮國公安懿王及三夫人改祔命為誌并題神主加同中書門下平章事開府儀同三司進嗣濮王哲宗立改鎮南節度使檢校司徒紹聖元年薨年六十七贈太師追封懷王謚榮穆子仲璉先是濮國嗣王四孟詣洛享園廟以河南府縣官充亞終獻宗暉之襲封也神宗始命以其子為

之仲璵遂以終獻侍祠凡十餘年父喪哀痛不能勝
纔服除而卒官右監門衛大將軍合州刺史宗晟紹
聖元年六月以武安軍節度使判大宗正事加檢校
司徒嗣濮王明年三月薨年六十五贈太師昌王謚
端孝宗晟好古學藏書數萬卷仁宗嘉之益以國子
監書治平將郊而雨或議改祫享英宗訪諸宗晟對
曰陛下初郊見上帝盛禮也豈宜改卜至誠感神在
陛下精意而已帝嘉納及郊雨霽帝數被疾密請早
建儲貳以係天下之望世稱其忠宗晟薨哲宗紹聖
二年四月宗愈以鎮安節度使開府儀同三司檢校

司徒嗣封故事嗣王以四時詣祠所宗愈方屬疾或曰不可以暑行曰吾身主祀而不往非禮也強輿以行疾遂亟是年八月薨年六十五贈太師追封襄王謚恭憲宗綽嗣官至河陽三城節度使檢校司徒紹聖三年二月薨年六十二贈太師追封榮王謚孝靖宗楚累拜武勝軍節度使開府儀同三司封南陽郡王紹聖三年三月以檢校司徒改武昌節度使嗣濮王既嗣爵當詣園薦獻會疾以弟宗漢代行歎曰不能親奉遽豆饗我先王而浮食厚祿安乎請以爵授弟不許四年六月薨贈太師惠王謚僖節宗祐克己

自約蕭然若寒士好讀書尤喜學易嘉祐中從父兄
初未立嗣咸推其賢詔以宗祐為後泣曰臣不幸幼
失怙恃將終身悲慕忍為人後乎敢以死請仁宗憐
而從之累遷清海軍節度使開府儀同三司封乘城
郡王紹聖四年八月加檢校司徒嗣濮王時已病當
祠園廟不肯移疾自秋涉冬連往來元符元年春又
亟往遂薨于祠下贈太師追封欽王謚穆恪宗漢英
宗幼弟也累拜保寧軍留後鄴國公東陽安康郡王
元符初以彰德軍節度使開府儀同三司檢校司空
嗣濮王徽宗即位徙寧江保平泰寧三鎮判大宗正

事加檢校司徒太保太尉帝幸濮邸遷其子孫官時
安懿王諸子獨宗漢在恩禮隆腆大觀三年八月薨
贈太師追封景王謚孝簡宗漢善畫嘗作八鴈圖人
稱其工仲增嗣仲增濮王孫於屬為長故封官至彰
德軍節度使開府儀同三司政和五年九月薨贈少
師追封簡王謚穆孝仲御自幼不群通經史多識朝
廷典故居父宗晟喪哲宗起知宗正力辭詔虛位以
須終制累遷鎮寧保寧昭信武安節度使封汝南王
郡王政和中以檢校少傅叅寧軍節度使開府儀同
三司嗣封天寧節遼使在廷宰相適謁告仲御攝事

率百僚上壽若素習者帝每見必加優禮稱為嗣王
宣和四年五月薨年七十一贈太傅追封郇王謚康
孝仲爰嗣徽宗即位拜建武節度使為大宗正加開
府儀同三司封江夏郡王徙節泰寧定武檢校少保
少傅宣和五年六月薨年七十贈太保追封恭王仲
理嗣靖康初為安國軍節度使加檢校少保開府儀
同三司嗣濮王者英宗本生父後也治平三年立濮
王園廟元豐七年封王子宗暉為嗣濮王世世不絕
封高宗南遷奉濮王神主于紹興府光孝寺仲湜字
巨源楚榮王宗輔之子安懿王孫也初名仲湜熙寧

十年授右內率府副率累遷密州觀察使知西外宗正事保大軍承宣使欽宗嗣位授靖海節度使更今名召知大宗正事未行汴京失守康王即帝位于南京仲湜由漢上率衆徑謁時嗣漢王仲理北遷乃詔仲湜襲封加開府儀同三司歷檢校少保少傅紹興元年充明堂亞獻七年薨帝為輟朝賜其家銀帛追封儀王謚恭孝仲湜事母以孝聞喜親圖史性酷嗜珊瑚每把玩不去手大者一株至以數百千售之高宗嘗問墜地則何如仲湜對曰碎矣帝曰以民膏血易無用之物朕所不忍仲湜慚不能對子士從士街

士籤士衍士歆士從靖康末為洛州防禦使建炎二年同知西外宗正事主管高郵軍宗子士從招潰卒置屯奏假江淮制置使許之賊李在犯楚州士從遣部將乘虛掩襲扭於小勝軍無紀律敗績士從移司衡溫二州臣僚以其弟士籤撓州縣士從不能制遂罷紹興四年遷涇洪二州觀察使權知濮王園令士從乞擇利便地奉安神位從之六年士街授象州防禦使遷華州觀察使同知大宗正事安慶軍承宣使主奉濮王祠事初以軍興南班宗子權罷歲賜至有身歿而不能殮者士街言于朝詔復舊制三十年拜

安德軍節度使典宗司凡十四年士錢官至安慶軍
節度使同知太宗正事隆興元年上言宗司文移視
官叙高下令詔臣兄也位反居臣下失尊卑叙乞易
置之詔可其奏士衍官至崇慶軍節度使知西外宗
正事右諫議何溥論士衍強市海舟罷官已而詔歸
南班奉朝請隆興中以邊事未寧與士錢奏減奉給
恩賞之半以助軍興詔加獎諭仲儻景王宗漢子也
初授右內率府副率轉右監門衛大將軍建炎末授
武功大夫忠州防禦使紹興中遷濟州知南外宗正
事八年加檢校少保向德軍節度使襲封嗣濮王仲

儻生而不慧以次得封入見榻前慟哭帝驚問故荅
語狂謬帝優容之九年薨上輟朝三日追封瓊王謚
恭惠士伐安懿王曾孫也紹興二十五年十一月襲
封除崇慶軍節度使初仲儻薨秦檜專政罷襲檜死
始封士伐踰年薨贈少師追封思王謚溫靖士輅士
伐弟也紹興二十八年由建州觀察使襲封授昭化
軍節度使初懿王神貌奉安報恩寺西挾屋居隘陋
士輅請別營祠堂許之久之加檢校少保累加開府
儀同三司賜嗣濮王居為世業除知大宗正事累加
三少充醴泉觀使淳熙七年薨贈太傅追封安王士

欽仲湜第十一子也由保康軍節度使襲封加開府儀同三司累陞三少慶元二年薨贈太傅追封欽王不秬安懿王玄孫也年七十六累轉武功郎士欽既薨不秬年最高得襲封除福州觀察使由庶官襲封自不秬始慶元五年轉武安軍承宣使俄薨贈開府儀同三司追封蔣國公不壘由武經大夫授利州觀察使襲封開禧初遷寧遠軍承宣使薨贈開府儀同三司追封安國公不儔開禧二年由安遠軍承宣使襲封除昭慶軍節度使遷檢校少保嘉定十年薨贈少師追封高平郡王不嫖由武翼大夫襲封授福州

觀察使時嘉定十一年也踰年而薨贈開府儀同三司追封惠國公臣僚上言嗣濮王元降指揮雖有擇高年行尊之文然高宗朝儀王仲湜以德望俱隆越仲琮而選拜武德郎釅次當襲封以官卑乃命士儻權奉祠事越十六年始正士儻之封是亦不拘定制也乞自今應封者命大宗司銓量都堂審察閣門引見然後奏取進止寧宗然之不凌父士穉不嫖既薨不凌由右千牛衛將軍授福州觀察使襲封嘉定十五年遷奉國軍承宣使十七年薨贈開府儀同三司追封惠國公

列傳卷第四

列傳卷第五

宋史二百四十六

開府儀同三司上柱國錄軍國重事兼丞相樞密院事領經進事都總校_長朕等奉

勅修

宗室三

吳王顥

益王頔

吳王佖

燕王俟

楚王似

獻愍太子茂

鄆王楷

肅王樞

景王杞

濟王栩

徐王棣

沂王禔

和王拭

信王榛

太子諶_{弟訓}

元懿太子勇信王璩

莊文太子愔

魏王愷 景獻太子詢 鎮王竑

英宗四子長神宗次吳榮王顥次潤王顏次益端獻王顏皆宣仁聖烈高皇后出也顏早亡徽宗賜名追封

吳榮王顥字仲明初名仲紂自右內率府副率為和州防禦使封安樂郡公轉明州觀察使進祔國公治平元年加檢校太傅保寧軍節度使同中書門下平章事封東陽郡王三年出閤神宗立進封昌王官制行冊拜司空徙王雍哲宗嗣位加太保換成德橫海二鎮徙封揚王賜贊拜不名五日一謁禁中帝致恭

如家人禮神宗祔廟拜太傅移鎮京兆鳳翔自熙寧
以來顥屢請居外章上輒卻至元祐初乃賜咸宜坊
第一區榜曰親賢與弟顥對邸車駕偕三宮臨幸留
宴終日拜太尉諸子皆命賜官制曰先皇帝篤兄弟
之好以恩勝義不許二叔出居于外蓋武王待周公
之意太皇太后嚴朝廷之禮以義制恩始從其請出
就外宅得孔子遠其子之意二聖不同同歸于道皆
可以為萬世法朕承侍兩宮按行新第顧瞻懷思潛
然出涕昔漢明帝問東平王在家何以為樂王言為
善最樂帝大其言因送列侯印十九枚諸子五歲以

上悉佩之著之簡策天下不以為私今王諸子性于忠孝漸于禮義自勝衣以上頎然皆有成人之風朕甚嘉之其各進一官以助其為善之樂尚勉之哉母忝父祖以為邦家光徙封徐王詔書不名宣仁有疾顥旦旦入問因亦被病宣仁祔廟拜太師徙王冀賜入朝不趨改淮南荆南節度使徙封楚王病益篤帝親挾醫視診令晝夜具起居狀聞小愈則喜既而薨年四十七帝即臨哭輟朝五日成服苑中贈尚書令兼中書令揚荆冀三州牧燕王謚曰榮陪塋永厚陵徽宗即位改封吳王顥天資穎異尤嗜學始就外傳

每一經終即遺講讀官以器幣服馬工飛白善射好
圖書博求善本神宗嘉其志尚每得異書亟馳使以
示嘗賜方團玉帶俾服而朝顥辭乃為製玉魚以別
之是後親王遂踵為故實初居英宗喪丐解官終制
以厭於至尊不克遂服慈聖光獻太后之服易月當
除顥曰身為孫而情文缺然若是可乎請如心喪禮
須上禪除即吉詔可子孝騫嗣終寧國軍節度使晉
康郡王孝錫終嘉州團練使贈永國公

益端獻王顥初名仲格封大寧郡公進鄴國公樂安
郡王嘉王所歷官賜略與兄顥同更武勝山南西保

信保靜武昌武安武寧鎮海成德荆南十節度徙王
曹荆位至太尉元祐三年七月薨年三十三贈太師
尚書令荆徐二州牧魏王謚端獻徽宗改封益王頽
端重明粹少好學長博通群書工飛白篆籀賓接官
僚歲滿當去輒奏留久者至十餘年頗好醫書手著
普惠集効方且儲藥以救病者子九人孝哲右驍衛
將軍早亡孝奕彰化軍節度觀察留後贈司空平原
郡王孝參奉國軍節度使改寧武武勝封豫章郡王
孝求邢州觀察使贈司空廣陵郡王孝詒孝隲孝悅
孝頽孝愿皆至節度使

神宗十四子長成王侑次惠王僅次唐哀獻王俊次
褒王伸次冀王侔次哲宗次豫悼惠王价次徐冲惠
王侔次吳榮穆王佖次儀王偉次徽宗次燕王俁次
楚榮憲王似次越王偁八王皆早薨侑僅伸偉徽宗
賜名追封俊侔侔价徽宗改封

吳榮穆王佖帝第九子初授南山東道節度使封儀
國公哲宗立加開府儀同三司大寧郡王進申王拜
司空帝崩似於諸弟為最長有目疾不得立徽宗嗣
位以帝兄拜太傅加殊禮旋拜太師歷京兆真定尹
荆揚太原興元牧徙國陳崇寧五年薨輟視朝七日

贈尚書令兼中書令徐州牧燕王謚榮穆又加贈侍中改封吳王子有奕武信軍節度使和義郡王

燕王俟帝第十子越王偁帝第十二子母曰林婕妤俟初授定武軍節度使檢校太尉封成國公偁初授武成軍節度使檢校太尉祁國公哲宗朝俟加開府儀同三司封咸寧郡王偁加開府儀同三司封永寧郡王是後累換節鉞歷任尹牧俟進封萃王偁封睦王徽宗朝俱歷太保太傅俟進封衛王魏王燕王偁進封定王鄧王越王靖康元年同遷太師俟授河東劔南西川節度使成都牧偁授永興成德軍節度使

雍州真定牧二年上皇幸青城父老邀之不及道遇
二王哭曰願與王俱死徐秉哲捕為首者戮之益兵
衛送二王于金營北行至慶源境上俟乏食薨偲至
韓州而薨紹興初有崔紹祖者至壽春府稱越王次
子受上皇蠟詔為天下兵馬大元帥興師恢復鎮撫
使趙霖以聞召赴行在事敗送臺獄伏罪斬于越州
市

楚榮憲王似帝第十三子初為集慶軍節度使和國
公進普寧郡王元符元年出閣封簡王似於哲宗為
母弟哲宗崩皇太后議所立宰相章惇以似對后曰

均是神宗子何必然乃立端王徽宗定位加司徒改鎮武昌武成徙封蔡拜太保移鎮保平鎮安又改鳳翔雄武以王府史語言指斥送大理寺驗治似上表待罪左司諫江公望上疏以為親隙不可開開則言可離貳疑迹不可顯顯則事難磨滅陛下之得天下也章惇嘗持異議已有隙迹矣蔡王出於無心年尚幼小未達禍亂之萌恬不以為恤陛下一切包容已開之隙復塗已顯之迹復泯矣恩意渥縟懽然不失兄弟之情若以曖昧無根之語加諸至親骨肉之間則有魏文相煎太急之譏而忘大舜親愛之道豈治

世之美事邪臣願陛下密詔有司凡無根之言勿形
案牘倘有瑕可指一入胸次則終不身忘迹不可泯隙
不可塗則骨肉離矣一有浸淫旁及蔡王之語不識
陛下將何以處之陛下何顏見神考於太廟乎疏入
公望罷知淮陽軍徽宗雖出公望然頗思其言止治
其左右崇寧中徙鎮荆南武寧崇寧五年薨贈太師
尚書令兼中書令冀州牧韓王改封楚王謚榮憲子
有恭定國軍節度使永寧郡王

哲宗一子獻愍太子茂昭懷劉皇后為賢妃時所生
帝未有子而中宮虛位后因是得立然纔三月而夭

追封越王謚冲獻崇寧元年改謚獻愍后之立也鄒
浩凡三上疏諫隨削其藁至是或謂浩有殺卓氏而
奪其子欺人可也詎可以欺天乎之語徽宗昭暴其
事復竄浩昭州而峻茂典冊后上表謝然浩蓋無是
言也

徽宗三十一子長欽宗次充王檉次鄆王楷次荆王
楫次肅王樞次景王杞次濟王栩次益王棫次高宗
次邠王材次祁王模次莘王植次儀王朴次徐王棣
次沂王櫟次鄆王拱次和王棫次信王榛次漢王椿
次安康郡王榑次廣平郡王榑次陳國公機次相國

公挺次瀛國公樾次建安郡王檉次嘉國公檉次溫國公棟次英國公榑次儀國公桐次昌國公柄次潤國公樅檉楫材拱椿機六王早薨

鄆王楷帝第三子初名煥始封魏國公進高密郡王嘉王歷奉寧鎮安鎮東武寧保平荆南寧江劔南西川鎮南河東寧海十一節度使政和八年廷策進士唱名第一母王妃方有寵遂超拜太傅改王鄆仍提舉皇城司出入禁省不復限朝暮於外第作飛橋複道以通往來北伐之役且將以為元帥會白溝失利而止欽宗立改鎮鳳翔彰德軍靖康初與諸王皆北

遷

肅王樞帝第五子初封吳國公進建安郡王肅王歷節度六鎮靖康初金人圍京城要帝子弟為質且求輸兩河於是遣宰臣張邦昌從樞使韓侂不軍為金人所留約俟割地畢遣還而挾以北去

景王杞初授武安軍節度使檢校太尉封冀國公大觀二年改授山南東道節度使加開府儀同三司封文安郡王政和中授檢校太保尋遷太保改授護國武昌軍節度使追封景王靖康元年授荆南鎮東軍節度使遷太傅二年遣詣金營充賀正旦使既歸又

從上幸青城及上皇出郊杞日侍左右衣不解帶食
不食肉上皇製發願文述祈天請命之意以授杞杞
頓首泣及北行鬚髮盡白

濟王栩初授鎮洮軍節度使檢校太尉封魯國公大
觀二年改授彰武軍節度使加開府儀同三司封安
康郡王政和中授檢校太保改荆南清海軍節度使
進封濟王靖康元年授護國寧海軍節度使遷太傅
同景王杞為賀金人正旦使既還又與何桌為請命
使金帥給栩曰自古有南即有北不可相無今所欲
割地而已栩回以白上且言金帥請與上皇相見上

曰豈可使上皇蒙塵遂自出以扈從行及索諸王家屬扈夫人曹氏避難他出徐秉哲捕而拘之遂同北去

徐王棣初授鎮江軍節度使檢校太尉封徐國公政和中授檢校太保宣和中改鎮南軍節度使加開府儀同三司封高平郡王尋改山南東道河陽三城節度使進封徐王後從淵聖北去紹興二年有萬州李勃者僞稱祁王內侍楊公謹與言徐王起居狀勃遂改稱徐王宣撫使張浚遣赴行在上命王府故吏驗視言非真詔送大理情得棄市

沂王曄初授橫海軍節度使檢校太尉冀國公政和中授檢校太保宣和中改劔南西川節度使加開府儀同三司封河間郡王尋改劔南東川威武軍節度使遷太保進封沂王後從淵聖出郊至北方與駙馬劉彥文告上皇左右謀變金遣人按問上皇遣莘王植駙馬蔡絳等對辨凡三日曄彥文氣折金人誅之和王栻初授靜江軍節度使檢校太尉廣國公三年授檢校太保尋改定武軍節度使加開府儀同三司封南康郡王靖康元年授瀛海安化軍節度使檢校太傅追封和王後從淵聖出郊有遺女一人高宗朝

封樂平縣主出適杜安石命太宗正司主婚

信王榛初授建雄軍節度使檢校太尉封福國公三年授檢校太保宣和末改安遠軍節度使加開府儀同三司封平陽郡王靖康元年授慶陽昭化軍節度使遷檢校太傅進封信王後從淵聖出郊北行至慶源亡匿真定境中時馬廣與趙邦傑聚兵保五馬山砦陰迎榛歸奉以為主兩河遺民聞風響應榛遣廣詣行在奏之其略曰邦傑與廣忠義之心堅若金石臣自陷賊中頗知其虛實賊今稍懂皆懷歸心且累敗於西夏而契丹亦出攻之今山西諸砦鄉兵約十

餘萬力與賊抗但皆苦窘蕪闕戎器臣多方存恤惟
望朝廷遣兵來援不然久之恐反為賊用臣於陛下
以禮言則君臣以義言則兄弟其憂國念親之心無
異願委臣總大軍與諸砦鄉兵約日大舉決見成功
廣既至黃潛善汪伯彥疑其非真上識榛手書遂除
河外兵馬都元帥潛善伯彥終疑之廣將行密授朝
旨使幾察榛復令廣聽諸路節制廣知事不成遂留
于大名府不進會有言榛將渡河入京朝廷因詔擇
日還京以伐其謀金人恐廣以援兵至急發兵攻諸
砦斷其汲道諸砦遂陷榛亡不知所在或曰後與上

皇同居五國城紹興元年鄧州有楊其姓者聚千餘人自稱信王鎮撫使翟興覺詐遣將斬之以聞

欽宗皇太子諱朱皇后子也政和七年生為嫡皇孫祖宗以來所未有徽宗喜蔡京奏除檢校少保常德軍節度使封崇國公從之會王黼得政謀傾京言其以東宮比人主遂降為高州防禦使靖康元年遷檢校少保昭慶軍節度使大寧郡王尋進檢校少傳寧國軍節度使四月詔立為皇太子二年上幸青城命密院同知孫傳兼太子少傳吏部侍郎謝克家兼太子賓客輔太子監國稱制行事未幾金人請二帝諭

太子出城統制吳革力請留欲以所募士微服衛太子
子漬圍以出傳不許乃謀匿民間別求狀類太子者
并宦者二人殺之送金人給以宦者竊太子欲投獻
都人爭之併傷太子遲疑不決者五日吳玠莫儔督
脅甚急范瓊恐變生以危言讐衛士遂擁太子與皇
后共車以出百官軍吏奔隨號哭太學諸生擁拜車
前太子呼云百姓救我哭聲震天已而北去弟訓

訓乃北地所生有碭山人留遇僧者金人見之曰全
似趙家少帝遇僧竊喜紹興十年三京路通詔求宗
室遇僧自言少帝第二子守臣遣赴行在過泗州州

官孫守信疑之白其守請于朝閣門言淵聖無第二子乃詔守信劾治遇僧伏罪黥隸瓊州後有自北至者曰淵聖小大王訓見居五國城

元懿太子諱粦高宗子也母潘賢妃建炎元年六月生于南京拜檢校少保集慶軍節度使封魏國公金人侵淮南帝幸臨安會苗傅劉正彥作亂逼帝禪位于粦改元明受既而傅等伏誅帝復位乃以粦為皇太子從幸建康太子立屬疾宮人誤蹴地上金鑪有聲太子驚悸疾轉劇薨謚元懿

信王璩字潤夫初名伯玖藝祖七世孫秉義郎子彥

之子也生而聰慧初伯琮以宗子被選入宮高宗命
鞠于婕妤張氏吳才人亦請于帝遂以伯玖命才人
母之賜名璩除和州防禦使時生七歲矣伯琮以建
國公就傳璩獨居禁中俄拜節度使封吳國公宰執
趙鼎劉大中王庶等堅持之命不果行會秦檜專政
遂除保大軍節度使封崇國公尋詔赴資善堂聽讀
紹興十五年加檢校少保進封思平郡王出就外第
時伯琮已封普安郡王璩官屬禮制相等夷號東西
府踰年改武昌軍節度使二十二年子彥卒璩去官
持服終喪還舊官顯仁太后崩普安郡王始立為皇

太子璩因加恩稱皇姪名位始定遷開府儀同三司判大宗正事置司紹興府孝宗即位璩表請入賀許之特授少保改靜江軍節度使頃之省紹興府宗正事改判西外宗正司璩累章乞閑改醴泉觀使淳熙中除少傅高宗崩奔赴得疾踰年而薨年五十九追封信王累贈太保太師始璩之入官也儲位未定者垂三十年中外頗以為疑孝宗既立天性友愛璩入朝屢召宴內殿呼以官不名也賜予無筭子四人師淳歷忠州團練使永州防禦使師灝師瀾師路並補武翼大夫孫希楫特補保義郎

莊文太子諱愔孝宗嫡長子也母郭皇后初名愉補
右內率府副率尋賜名愔除右監門衛大將軍榮州
刺史孝宗為皇子時愔拜蘄州防禦使及受禪除少
保永興軍節度使封鄧王故事皇子出閣封王兼兩
鎮然後加司空愔自防禦使躡拜少保章異數也乾
道元年立為皇太子冊廣國夫人錢氏為妃詔增東
宮從衛太子謙讓及奏捐月給雜物從之三年秋太
子病暍醫誤投藥病劇上皇與帝親視疾為赦天下
越三日薨年二十四謚莊文太子賢厚上皇與帝皆
愛之帝從禮官議服期以日易月文武百官服衰服

一日而除東宮臣僚齊衰三月臨七日而除比堊帝
再至東宮命宰臣奉謚冊大小祥皆以執政官行禮
子挺錢氏所生也甫晬除福州觀察使封榮國公乾
道九年卒贈武當軍節度使追封豫國公寧宗時命
宗子希璫為太子後希璫藝祖九世孫也賜名摺補
右千牛衛將軍置教授于府開禧二年除忠州防禦
使嘉定八年更名思正

魏惠憲王諱愷莊文同母弟也初補右內率府副率
轉右監門衛大將軍貴州團練使孝宗受禪拜雄武
軍節度使開府儀同三司封慶王莊文太子薨愷次

當立帝意未決既而以恭王英武類已竟立之加愷
雄武保寧軍節度使追封魏王判寧國府妻華國夫
人韋氏特封韓魏兩國夫人以示優禮賜黃金三千
兩白金一萬兩命宰執設祖于玉津園王登車顧謂
虞允文曰更望相公保全比至鎮奏朝天申節許之
府長史上言欲與司馬分治郡俾王受成愷奏曰臣
被命判府今專委長史司馬是處臣無用之地况一
郡置三判府臣恐吏民紛競不一徒見其擾長史司
馬宜主錢穀訟牒俾擬呈臣依而判之廢上下安事
益易治又請增士人貢額朝廷悉從之愷究心民事

築圩田之墮圯者帝手詔嘉勞之淳熙元年徙判明
州輟屬邑田租以贍學得兩歧麥圖以獻帝復賜手
詔曰汝勸課藝植農不游惰宜獲瑞麥之應加愷荆
南集慶軍節度使行江陵尹尋改永興成德軍節度
使揚州牧七年薨于明州年三十五帝素服發哀於
別殿贈淮南武寧軍節度使揚州牧兼徐州牧謚惠
寧王性寬慈上皇雅愛之雖以宗社大計出王於外
然心每念之賜賚不絕訃聞帝泫然曰向所以越次
建儲者正為此子福氣差薄耳治二郡有仁聲薨之
日四明父老乞建祠立碑以紀遺愛子二人攄早卒

栢生於明州母卜氏信安郡夫人王薨還居行在栢性早慧帝愛之將內禪升耀州觀察使封嘉國公慶元間封吳興郡王領昭慶軍節度使開禧三年薨贈太保封沂王謚靖惠子垓三歲而夭詔立宗室希瞿子為其後更名均領右千牛衛將軍置教授于府尋加福州觀察使後更名貴和即鎮王竑也

景獻太子諱詢燕懿王後藝祖十一世孫也初名與愿寧宗既失兗王從宰執京鎧等請取與愿養于宮中年六歲賜名曦除福州觀察使嘉泰二年拜威武軍節度使封衛國公聽讀資善堂開禧元年時邊事

益急金人請誅首謀用兵者曦用翊善史彌遠計奏
韓侂胄輕起兵端上危宗社宜賜黜罷以安邊境從
之曦立為皇太子拜開府儀同三司封榮王更名懣
詔御朝太子侍立宰執日赴資善堂會議尋用天禧
故事宰輔大臣並兼師傅賓客太子出居東宮更名
詢嘉定十三年薨年二十九謚景獻

鎮王竑希瞿之子也初沂靖惠王薨無嗣以竑為之
後賜名均尋改賜名貴和太子詢薨迺立貴和為皇
子賜名竑授寧武軍節度使封祁國公嘉定十五年
五月加檢校少保封濟國公十七年六月辛未竑生

子詔告天地宗廟社稷宮觀八月癸未賜竈子名銓
授左千牛衛大將軍丁亥銓薨贈復州防禦使追封
永寧侯竈上表稱謝竈好鼓琴丞相史彌遠買美人
善鼓琴者納諸御而厚廩其家使美人矚竈動息必
以告美人知書慧黠竈嬖之宮壁有輿地圖竈指瓊
厓曰吾他日得志置史彌遠於此又嘗呼彌遠為新
恩以他日非新州則恩州也彌遠聞之嘗因七月七
日進乞巧竒玩以覘之竈乘酒碎於地彌遠大懼日
夕思以處竈而竈不知也時沂王猶未有後方選宗
室希璠子昀繼之一日彌遠為其父飯僧淨慈寺獨

與國子學錄鄭清之登惠日閣屏人語曰皇子不堪
負荷聞後沂邸者甚賢今欲擇講官君其善訓迪之
事成彌遠之坐即君坐也然言出於彌遠之口入於
君之耳若一語洩者吾與君皆族矣清之拱手曰不
敢乃以清之兼魏忠憲王府教授清之日教昀為文
又購高宗書俾習焉清之上謁彌遠即以昀詩文翰
墨以示彌遠譽之不容口彌遠嘗問清之吾聞其賢
已熟大要竟何如清之曰其人之賢更僕不能數然
一言以斷之曰不凡彌遠領之再三策立之意益堅
清之始以小官兼教授其後累遷兼如故寧宗崩彌

遠始遣清之往告昀以將立之意再三言之昀默然不應最後清之乃言曰丞相以清之從遊之久故使布腹心於足下今足下不荅一語則清之將何以復命于丞相昀始拱手徐荅曰紹興老母在清之以告彌遠益相與歎其不凡竝跂足以需宣召久而不至彌遠在禁中遣快行宣皇子令之曰今所宣是沂靖惠王府皇子非萬歲巷皇子苟誤則汝曹皆處斬竝不能自已屬目墻壁間見快行過其府而不入疑焉已而擁一人徑過天已暝不知其為誰甚惑昀既至彌遠引入樞前舉哀畢然後召竝竝聞命亟赴至則

每過宮門禁衛拒其從者彌遠亦引入樞前舉哀畢
引出惟殿帥夏震守之既而召百官立班聽遺制則
引竑仍就舊班竑愕然曰今日之事我豈當仍在此
班震給之曰未宣制以前當在此宣制後乃即位耳
竑以為然未幾遙見燭影中一人已在御坐宣制畢
閣門贊呼百官拜舞賀新皇帝即位竑不肯拜震捽
其首下拜皇后矯遺詔竑開府儀同三司進封濟陽
郡王判寧國府帝因加竑少保進封濟王九月丁丑
以竑充醴泉觀使令就賜第寶慶元年正月庚午湖
州人潘壬與其弟丙謀立竑竑聞變匿水竇中壬等

得之擁至州治以黃袍加身竑號泣不從不獲已與之約曰汝能勿傷太后官家乎衆許諾遂發軍資庫金帛會昇犒軍命守臣謝周卿率官屬入賀僞為李全榜揭于門數彌遠廢立罪云今領精兵二十萬水陸進討比明視之皆太湖漁人及巡尉兵卒不滿百人耳竑知其謀不成率州兵討之遣王元春告于朝彌遠命殿司將彭任討之至則事平彌遠令客秦天錫託召醫治竑疾竑卒無疾丙戌天錫詣竑諭旨逼竑縊于州治帝輟朝賻銀絹各一千會子萬貫贈少師保靜鎮潼軍節度使給事中盛章權直舍人院王堅

一再繳奏詔從之右正言李知孝累奏追奪王爵降封巴陵縣公於是在廷之臣真德秀魏了翁洪咨夔胡夢昱等每以竑為言彌遠輒惡而斥遠之端平元年詔復官爵妻昱氏為比丘尼賜惠淨法空大師月給鉢錢百貫景定五年度宗降詔追復元贈節度使德祐元年提領戶部財用兼脩國史常楙請立竑後試禮部侍郎兼中書舍人王應麟請更封大國表墓錫謚命大宗正司議選擇立後迎善氣銷惡運莫先於此下禮部議贈太師尚書令依舊節度使陞封鎮王謚昭肅以田萬畝賜其家遣應麟致祭 卷第五

列傳卷第六

宋史二百四十七

開府儀同三司桂國鎮國軍前書右丞相監修國史領經筵事都總裁院等奉
勅修

宗室四

子直

子崧

子櫟

子砥

子晝

子灞

師曩

希言

希憚

士晤

士儂

士嶠

士晴

不群

不棄

不尤

不恩

善俊

善譽

汝述

叔近

叔向

彥倓

彥櫟

彥逾

子洎字正之燕王五世孫父令鑠官至寶文閣待制
子洎以蔭補承務郎累遷少府監主簿改河南少尹
時治西內子洎有幹才漕使宋昇器之或事有未便
子洎輒力爭昇每改容謝之除蔡河撥發綱運官會
夏旱河水涸轉餉後期貶秩一級提舉三門白波輦
運事除直秘閣丁內艱起復累進龍圖閣祕閣脩撰
除陝西轉運副使初蔡京鑄夾錫錢民病壅滯子洎
請鑄小鐵錢以權之因範格以進徽宗大說御書宣
和通寶四字為錢文既成子洎奏令民以舊銅錢入

官易新鐵錢旬日易得百餘萬緡帝手札以新錢百萬緡付五路均糴細麥命子洎領其事民苦限迫詣子洎訴者日數百人子洎奏請寬其期民便之會蔡京再相言者希京意論子洎亂錢法落職奉祠靖康初復祕閣脩撰金人侵洛子洎奔荆南潰兵祝靖盛德破荆南城子洎匿民家靖等知之來謁言京城已破子洎泣說之曰君輩宜亟還都城護社稷取功名無貪財擾州縣也皆應曰諾子洎因草檄趣之翌日靖等遂北行紹興元年召見復徽猷閣直學士知西外宗正司改江西都轉運使時建督府軍須浩繁子

直運餉不絕以功進實文閣直學士再知西外宗正司三京新復除京畿都轉運使以疾辭卒于家年六十七子直幼警悟蘇軾過其家抱置膝上謂其父曰此公家千里駒也及長善談論工詩然崇寧大觀間土木繁興子直每董其役識者鄙之

子崧字伯山燕懿王後五世孫登崇寧五年進士第宣和間官至宗正少卿除徽猷閣直學士知淮寧府汴京失守起兵勤王道阻未得進聞張邦昌僭位以書白康王宜遣師邀金人河上迎請兩宮問罪僭逆若議渡江恐誤大計遂與知潁昌府何志同等盟傳

檄中外已而聞金人退引兵襄邑遣范埴徐文中詣
濟王請王進兵南京且言國家之制無親王在外者
主上特付大王以元帥之權此殆天意亟宜承制號
召四方豪傑則中原可傳檄而定王命子崧充大元
帥府參議官東南道都總管邦昌家在廬州子崧檄
通守趙令儵幾察之且請捕誅其母子以絕姦心又
言自圍城以來朝命隔絕乞下諸路凡有事宜並取
大元帥府裁決偽檄毋輒行宣撫使范訥逗撓營私
所宜加罪宜蠲被兵州縣租經理淮南荆浙形勢之
地毋為群盜所據檄止諸路毋受邦昌偽赦移書責

邦昌曰人臣當見危致命今議者籍籍謂劫請傾危之計實由閣下不然金人何堅拒孫傳之請而卒歸於閣下也敵既遠去宜速反正若少遲疑則天下共誅逆節雖悔無及矣又遺書王時雍曰諸公相與亡人之國方且以為佐命功臣不知平日所學何事會邦昌遣使迎王次第白子崧子崧即貽王書曰似聞謂以京師殘破不可復入止欲即位軍中便圖遷徙臣竊惑焉夫欲致中興當謹舉措宜先謁宗廟覲母后明正誅賞降霈四方若京師果不可都然後徐議所向遂傳檄京師奏于隆祐太后曰諸路先聞二聖

北遷易姓改國恐間有假討逆之名以竊據州郡者
乞速下明詔諭四方以迎立康王之意庶幾人心慰
安奸宄自消矣尋以所部兵會濟州康王即位子崧
請放諸路常平積欠錢又言臺諫為人主耳目近年
用非其人率取旨言事請遵舊制聽學士中丞互舉
范祖禹常安民上官均先朝言事盡忠請錄其子帝
皆可其奏因建三屯之議一屯澶淵一屯河中陝華
一屯青鄆間以張聲勢萬一敵騎南侵則三道並進
可成大功除延康殿學士知鎮江府兩浙路兵馬鈐
轄上章論王時雍徐秉哲吳玠莫儔范瑄胡思王紹

王及之顏博文余大均等逼遷上皇取太子辱六宮
捕宗室竊禁物都人指為國賊伏望肆諸市朝以為
臣子之戒時滑州兩經殘破子崧薦傅亮可任除亮
滑州通判黃潛善沮之命遂寢賊趙萬犯鎮江子崧
遣將擊萬於丹徒調鄉兵棄城為備頃之官軍敗歸
鄉兵驚潰子崧率親兵保焦山寺賊據鎮江初昌陵
復土司天監苗昌裔謂人曰太祖後當再有天子子
崧習聞其說靖康末起兵檄文頗涉不遜子崧與御
營統制辛道宗有隙道宗求得其文上之詔御史往
案其獄情得帝震怒不欲暴其罪坐以前擅棄城降

單州團練副使謫居南雄州紹興二年赦復集英殿脩撰而子崧已卒于貶所

子櫟燕懿王後五世孫登元祐六年進士第靖康中為汝州太守金人再渝盟破荆湖諸州獨子櫟能保境土李綱言于朝遷寶文閣直學士尋提舉萬壽觀紹興七年卒

子砥藝祖後令珣之子也仕至鴻臚丞北遷至燕山父之欲遁歸乃遣其徒朱國賓王孝安至中京求得上皇宸翰懷之以歸建炎二年六月至行在帝命輔臣召問于都堂子砥言金人講和以用兵我國歛兵

以待和往者契丹主和議女真主用兵十餘年間竟
滅契丹今復蹈其轍譬人畏虎啗虎以肉食盡終必
食人若設陷穽待之庶能制虎因復故官已而賜對
稱旨命知台州卒

子晝字叔問燕王五世孫少警敏強記工書翰累官
憲州通判宣和初充詳定九域圖志編脩官出知澤
州改密州詔為刑部員外郎以憂去建炎四年遷吏
部員外郎尋用大宗正士儂薦遷尚書左司員外郎
兼權貨務歲收茶鹽香錢六百九萬餘緡以功進秩
一階試太常少卿集太常因革禮八十篇為二十七

卷上言復春分祀高禘禮除權禮部侍郎遷徽猷待
制樞密都承旨以公族為侍從及改官制後都承旨
用文臣皆自子晝始衢嚴信饒之民生子多不舉子
晝請禁絕之累求補外遷徽猷閣直學士知秀州既
而奉祠以歸寓于衢紹興十二年卒年五十四

子灞字清卿秦康惠王後孝靖公令輿之子也七歲
而孤家貧力學登宣和中進士第調真州刑曹掾與
守爭獄事解官去改衢州推官胡唐老奇其才任之
屬時多故子灞佐唐老繕完城具苗劉兵至城下不
能攻以功進一秩累官吏部郎中求補外遷戶部郎

中總領江淮軍馬錢糧諸司饋禮月以千緡悉歸之
公帑除直秘閣兩淮轉運副使朝廷遣人檢沙田蘆
場欲緊增租額子瀟以承買異冒占力止之時議者
言田之並太湖者被水患宜分道諸浦注之江詔子
瀟往案視還言太湖當數州巨浸豈松江一川所能
獨泄昔人於常熟北開浦二十四以達大江又開浦
十於崑山東南以入海今皆湮塞宜加疏浚從之遂
浚常熟東柵至雉浦入于涇谷又疏鑿福山塘至尚
市橋北注大江分殺其勢水患用息明州守趙善繼
治郡殘酷子瀟率諸監司劾罷之除直敷文閣知臨

安府吏不能欺禁權家僮人子女為僕妾者詔權戶部侍郎陞華文閣待制復知臨安府調三衙卒修築都城不擾而辦金主亮渝盟子瀟獻助軍錢十五萬緡特遷一秩帝幸建康充行宮留守參謀官扈蹕還復知臨安府金人來議和子瀟謂事情叵測宜以軍禮待之孝宗嗣位志圖恢復子瀟練兵習為鵝鸛魚麗陣上觀於便殿嘉之賜金帶擢敷文閣直學士移知明州沿海制置使臺諫王十朋王大寶抗疏留之帝曰朕委以防海行召還矣初海寇以賂通郡胥吏吏反為之用匿其蹤迹賊遂大熾商舶不通子瀟以

禮延土豪俾率郡胥分道入海告之曰用命者有厚
賞不則殺無貸胥衆震恐爭指賊處悉禽獲凡豪猾
為賊囊橐者窮治之海道遂平陞龍圖閣直學士知
福州歲饑告糴旁郡米價頓平民賴以濟進龍圖閣
學士移知泉州吏有掠民女為妾者其妻妬悍殺而
磔之貯以缶抵其兄興化掾安厝中妾父詣郡訴吏
不決子濡訪知狀亟遣人往興化果得缶以歸獄遂
決其發擿槩類此乾道二年卒于官年六十六
師霁字從善系出燕懿王王生彰化軍節度使惟忠
惟忠生宣城侯從謹從謹生崇國公世恬世恬生嘉

國公令駿中興初韓世清挾令駿為變裂黃旗被其身固拒獲免令駿生朝奉郎子笈子笈生和州防禦使伯驪伯驪少從高宗于康邸以文藝侍左右師曩伯驪之子也舉進士第除司農簿遷金部郎中孝宗奇其才顧遇頗厚師曩奏左右曹度支倉部宜立總計司歸併財物之數以絕吏奸制可知吉州即山鍊銅足治欠額二十萬進戶部郎官淮東總領光宗初擢太府少卿知秀州改淮南運判時郡鐵錢不行鹽商弗至師曩請發度牒出倉粟以收鐵錢鹽利遂通累遷司農卿知臨安府有僧號散聖者以妖術惑衆

師曩捕治黥之韓侂冑用事師曩附之遂得尹京侂
冑生日百官爭貢珍異師曩最後至出小合曰願獻
少果核侂冑啓之乃粟金蒲萄小架上綴大珠百餘
衆慚沮侂冑有愛妾十四人或獻北珠冠四枚於侂
冑侂冑以遺四妾其十人亦欲之侂冑未有以應也
師曩聞之亟出錢十萬緡市北珠製十冠以獻妾為
求遷官得轉工部侍郎侂冑嘗飲南園過山莊顧竹
籬茅舍謂師曩曰此真田舍間氣象但欠犬吠鷄鳴
耳俄聞犬吠聲叢薄間視之乃師曩也侂冑大笑久之
以工部尚書知臨安府侂冑將用兵師曩度侂冑材

疎意廣必召禍乃持異論侍御史鄧友龍劾罷之侂
冑死其黨多坐謫以師罷嘗與侂冑異故獲用除寶
謨閣直學士知鎮江府會荆湖始置制閫以命師罷
給事中蔡幼學繳其命遂罷歸未幾詔為兵部尚書
知臨安府幼學時為學士亦不草詔留元剛草之時
楮輕糴貴師罷尹京未數月楮價寢昂糴亦稍平執
政愈益賢之會武學士柯子冲廬宣德以事至府師
罷擅撻遣之衆盡譴文武二學之士交接牒師罷乃
罷免與祠卒于家年七十師罷四尹臨安有能聲嘗
鈞致民罪沒其家貲諂事權貴人以是鄙之

希言字若訥惠王令應元孫也淳熙十四年登第調
衢州司戶合郡民以計表其坊里標其戶數為圖獻
于守守才之西安令不職守檄希言攝邑漕善令會
嚴州請復烏龍嶺稅場檄希言往訪之俾令得復職
希言力陳烏龍場不當復漕怒曰衢已復孔步章戴
二場何烏龍獨不可復希言謂二場當併罷去漕不
能奪二場竟亦廢改吉州司理屬邑有誣人以殺人
罪者吏治之急囚誣服希言鞫得實檄縣他捕乃得
真盜用楊萬里周必大薦授臨安府司法改淮西總
所幹辦移書約諸郡綱必時發至即受納無滯留始

至軍庫見錢不滿千緡比去庫錢充溢知臨安仁和縣關學宮四百餘畝適大旱蝗集御前蘆塲中亘數里希言欲去蘆以除害中使沮其策希言驅卒燔之臨平塘隄決希言督役親捧土投石兵民爭奮堤成因築重隄後不復決民病和買絹折錢重希言節公費代其輸除大社令遷樞密院編脩官兼右司上言諸將但務城守敵來不拒去不復追異時之憂殆不止保江而已宜諭諸將一軍受圍諸軍共守敵不渡淮則均受賞以戰為守毋以守為守遷宗正丞請南班得與輪對許之累遷秘書丞著作郎軍器少監皆

燕右司又充密院檢詳為宰屬樞掾凡六年奉祠去
嘉定十七年卒年六十一贈資政殿大學士封越國
公謚忠憲子與權登進士第再中刑法科官至開府
儀同三司

希惲字伯和燕王八世孫登淳熙十四年進士第趙
汝愚帥福建希惲為屬吏嘗言治人如脩身治政如
理家愛民如處昆弟取古今官著惠愛者緝為一編
曰是吾師矣汝愚嘉之薦于憲辛棄疾棄疾尚氣僚
吏不敢與可否希惲獨盡言無所避屬邑候官苦稅
重每不登額希惲稽核公帑羨錢以足之棄疾亦薦

其能汝愚當國調江東運司幹辦同寅有坐侂冑黨者諸司莫敢薦希惲賢其人請以薦已者薦之改太平州通判先是盜黥而逃者捕得處死希惲言強盜特貸命而輒逃者斬今黥罪致死非法之平也自是皆減死論遷江西茶鹽提舉歲饑惡少聚劫希惲將自臨按幕屬力止之不聽曰希惲不出饑民終不得食且召亂矣遂行發粟賑給禽首謀者治之其黨遂散陞本路帥兼漕事黑風峒羅世傳寇郴陽奸民潛通賊陰濟以糧希惲捕治之賊乏食乃去未幾李元礪寇郴陳廷佐寇南安復誘羅世傳與合劫掠至龍

泉有何光世者能知賊動息希懌授光世計俾誘世
傳誅元礪以自贖功未竟移知平江府其後世傳果
縛元礪以獻廷佐勢孤亦降移知太平州希懌為倖
日習知其民利病遂損折市價減榷酤額以蘇民力
已而乞祠遷端明殿學士換昭信軍節度使開府儀
同三司致仕嘉定五年卒年五十八贈少保封成國
公

士晤字公美濮安懿王魯孫也天資警敏兒時儼如
成人比弱冠為右監門衛大將軍貴州團練使從上
皇北遷次洛州東與諸宗室議欲遁還據城謀未就

而金人圍合皆散走士晤乘驢西亡夜半盜攷驢去
徒步疾趨遲明抵武安酒家語人曰我皇叔也邑官
聞之來謁資以衣冠鞍馬因募得少壯百餘人從至
磁州招集義兵以解洛圍旬日間得勝兵五千人歸
附者數萬時洛州守臣王麟欲叛降敵軍民怒殺之
推統制韓一為主士晤夜半薄城下力戰破圍翌日
入城部分守禦敵治壕塹樹鹿角示以持久士晤礪
將士死守飛火砲碎其攻具以計生得其首領敵乃
解圍去以功遷權知洛州仍兼防禦使建炎二年金
人再犯洛糧盡援絕衆不能守乃擁士晤出城由白

家難抵大名府詔赴行在紹興五年遷泉州觀察使
再遷平海軍承宣使知南外宗正事時泉州新建向
學者少士晤奏宗子善軫文藝卓絕衆所推譽乞免
文解由是人知激勸遷節度使未拜而卒年四十六
贈少師追封和義郡王淳熙中謚忠靖子不流歷臨
安紹興帥治有聲

士儂字立之郇康孝王仲御第四子有大志好學善
屬文初補右班殿直累遷忠州防禦使鄭州觀察使
由寧遠軍承宣使轉權同知大宗正事時康王建大
元帥府士儂請於孟太后乞命帥府得承制便宜行

事又請奉王承大統太后從之王遂即位除光山軍節度使扈蹕南幸黃潛善等用事士儂論其誤國潛善斥之出知南外宗正事會苗傅劉正彥作亂士儂易服入杭以蠟書遺張浚趣其勤王復遺呂頤浩書勉其與浚同濟國難苗傅等怒浚浚坐謫復遺浚書謂朝廷無他意俾賊勿疑耳事平加檢校少保除同知大宗正事丁母憂起復除大宗正事請序位安定郡王下從之累乞祠不許以定策功詔其子不議政文秩不怵易環衛官加士儂檢校少師尋加開府儀同三司判大宗正事入覲勸帝留意恤民金人既歸

河南陝西地命士儂謁陵寢遂入栢城披歷榛莽隨
宜葺治禮畢而還特封齊安郡王以旌其勞尋權主
奉濮安懿王祠事軍興罷宗室賜予至有喪不能歛
者士儂以聞詔總麻袒免親任環衛官而身亡者賜
錢有差士儂數言事忤秦檜及岳飛被誣士儂力辨
曰中原未靖禍及忠義是忘二聖不欲復中原也臣
以百口保飛無他檜大怒諷言者論士儂交通飛蹤
迹詭秘事切聖躬遂奪官中丞万俟卨復希旨連擊
之謫居于建凡十二年而薨年七十帝哀之贈太傅
追封循王六子皆進官二階長子不凡方苗傳之亂

剗股納蠟書持告張浚以功轉兩官易文資從趙哲
收復建州殺葉濃以功賜爵二級

士崙字仰夫太宗五世孫初以廕補官累轉太子率
府副率建炎初隆祐太后幸洪州敵奄至百司散走
士崙至一大船中見二帝御容負以走遇潰兵數百
同行至山中衆欲聚為盜士崙出御容示之曰盜不
過求食為朝夕計耳孰若仰給州縣士崙以近屬諭
之必從如此則今日不饑餓後日不失賞是一舉而
兩得也衆聽命乃走謁太后虔州會虔民作亂鄉兵
在外為應與官軍相持士崙詣執政謂當請太后急

肆赦人知免死庶可安集又宜急諭城中城中定則
外寇可弭譬如服藥心腹已安外禦風濕乃餘事耳
赦既下城中遂定遷右監門衛大將軍惠州防禦使
紹興二十一年卒贈建寧軍承宣使追封建安郡王
士靖太宗之後商濮王之裔也從上皇俱北遷乘間
變姓名入僧寺中落髮衣僧衣以行抵會稽扈駕循
幸以覃恩轉千牛衛將軍奉朝請而卒

不群字介然太宗六世孫宣和中量試授承事郎靖
康初宰濟南章丘縣縣當山東河北之衝不群募效
用五千人增城浚濠為戰守備敵攻圍兩月不能下

遷維州通判陞直祕閣通判鎮江府辟充兩浙宣撫
司主管機宜文字高宗在越詔改郴州時群盜出沒
湖湘間不群嚴備禦盜不能犯進直顯謨閣移知鼎
州充湖北兵馬副鈐轄既而朝廷慮郴失守復留不
群于郴會岳飛破曹成成遁因犯郴不群棄城固守
拒卻之進直寶文閣移知宣州軍需以時辦而民不
擾進秩二階知廬州鄴瓊叛擁不群北去尋釋之以
歸帝召見問瓊叛故不群曰由劉錡除制置瓊等以
為圖已蕪撫諭後時故叛帝悔之除知荆南府累遷
兩浙路轉運副使卒于官

不棄字德夫太宗之裔紹興中為江東轉運判官秦
檜忌四川宣撫使鄭剛中以不棄能制之除太府少
卿四川宣撫司總領官初趙開總蜀賦宣撫司文移
率用申狀不棄至官用張憲成故事以平牒見剛中
剛中愕然久之始悟其不隸己遂有隙不棄欲盡取
宣撫司所儲剛中不與不棄怒剛中辟利州轉運使
王陟兼本司叅議不棄劾罷之二人愈不相能檜併
召還剛中在蜀服用頗踰制不棄復文致其事檜乃
罷剛中陞不棄敷文閣待制知臨安府踰年改工部
侍郎尋除敷文閣直學士知紹興府時浙東旱饑民

多流亡提舉秦昌時檜兄子也不棄言其悉心振恤全活甚衆昌時得遷秩其媚檜如此未幾卒

不尤有武力靖康之難與王明募義兵與金人戰雄張河南北盜皆避其鋒曰此小使軍也高宗即位引衆歸補武翼郎從岳飛平湖寇飛死檜奪其兵遣守橫州而卒子善悉進士登第累官敷文閣直學士兩浙轉運副使

不忌字仁仲嗣濮王宗暉曾孫也父士圃從上皇北遷遙拜集慶軍節度使不忌初補保義郎紹興二十七年登第易左宣義郎調婺州金華丞治縣豪何汝

翼械請於郡編隸他州邑人憎服除永州通判郡歲輸米倍收其贏民病之不忍言於守損其數帥司檄不忍錄靖州獄辨出寃者數十百人靖人德之繪其像以祠除知開州開在巴東俗鄙陋不忍為興學俾民知孝義郡有鹽井舊長吏必遣所親監之私其利不忍罷遣鹽利倍入郡計用饒以羨餘代民輸夏秋兩稅及天申節銀綃在開二年民絕閭爭夜戶不閉諸司交薦以比古循吏轉夔州轉運判官開人數千遮城門不得行至夔民病上供銀時部使者以親故攝大寧鹽場專其利不忍斥去而鹽獲羨餘乃出錢

市羨鹽數十萬斤易米得三萬餘斛運抵湖北省銀以歸代諸郡納上供銀省緡錢十五餘萬改成都路轉運判官適歲饑不怠行抵瀘南貸官錢五萬緡遣吏分糴比至下令曰米至矣富民爭發粟米價遂平雙流朱氏獨閉糴邑民群聚發其廩不怠抵朱氏法籍其米黥盜米者民遂定永康軍歲治都江堰籠石蛇絕江遏水以灌數郡田吏盜金減役夫堰不固而圯田失水故歲屢饑不怠躬視操板築繩吏以法乃出令民業耕者田主貸之事末作者富民振之老幼疾患者官為粥視全活數百萬黎州青羌奴結兒反

制司調兵往戍屬不怠給餉故事富人出糧而下戶
以力致于邊不怠曰民饑不可擾也以糴餘米發卒
運之已而朝廷命不怠攝制司初官兵敗前制使遣
人賂奴結兒以和不怠曰奴結兒吐蕃小種也今且
和若大族何不聽會酋豪夢東畜列率數千人入漢
地二百餘里成都大恐不怠靜以鎮之召僚屬飲夜
遣步將領飛山軍徑赴沉黎又徙綿州兵戍邛州為
後援戒之曰堅守勿動密檄諸蕃部生獲吐蕃一人
賞十縑殺一人二縑於是邛部川首領崖襪合諸部
落大破吐蕃於漢源斬夢東畜列首來獻凡十有六

日而平嘉州虛恨蠻入寇不怠標吐蕃首境上蠻懼
一夕遁去不怠乃令緣邊家出丁夫一人分戍諸堡
復其家不怠罷歸蜀人送者自成都至雙流遮道不
得行未幾除成都提刑改江西路轉運判官廷臣薦
其賢詔授右監門衛大將軍惠州防禦使知大宗正
事非常制也吏白承受奏請須用中貴人不怠曰有
司不存乎罷不用中貴人或請見輒謝出之進明州
觀察使俄陞招慶軍承宣使金人完顏烈來聘充館
伴副使金使從者舊見館使皆對揖不怠不為禮宴
玉津園不怠連射皆中使者驚服不怠以文行訓勉

族屬薦其秀傑者奏新學宮增廣弟子員做大學校
定法置自訟齋使有過者讀書其中人人感勵淳熙
十四年卒年六十七贈開府儀同三司封崇國公不
怠性篤孝生七歲遭父北遷每思慕涕泣長力學母
曹氏止之吞曰君父讐未報非敢忘富貴也登第時
已入仕法當超兩秩請回授其母母封法止令人高
宗嘉其志特封郡夫人居官所至有聲立朝好言天
下事蜀中武帥操重權不怠請復置安撫司相維而
治其論王抃不宜揀選諸路軍王友直不可為副都
指揮使尤人所難言者遇大旱一日九疏勸上求直

言通下情退而燔其藁時布衣上書狂悖多抵罪不
忍謂太上皇帝不罪言者此宜書之御座右帝悚然
可之既嘉其忠諒每宴禁中帝飲之酒顧謂皇太子
曰此賢宗室也一日坐待漏院有給事中白英國公
借擊毬馬不怠正色曰上惟一皇孫萬一馬驚墮斬
汝輩無益也馬竟不可得所敬者朱熹張栻死為
請謚又請用熹其好尚如此

善俊字俊臣太宗七世孫父不衰閩路兵馬鈐轄善
俊初補承節郎紹興二十七年登第換左承務郎調
南城丞改昭信軍簽判竒之虞允文亦薦其有邊帥

才除幹辦諸司審計司知郴州敷奏稱旨留為太府
寺丞尋攝帥知廬州會歲旱江浙饑民麋至善俊括
境內官田均給之貸牛種餼屋以居死者為給槨人
至如歸州城舊毀于兵善俊葺完之因言異時恃焦
湖以通饋餉今既堙涸宜募鄉兵保孤姥二山治屋
以儲粟敵或敗盟則吾城守有餘餉道無乏矣又增
築學舍新包拯祠春秋祀之人感其化累遷龍圖閣
直學士移知建州建俗生子往往不舉善俊痛繩之
給金穀捐己奉以助其費再知廬州首言和好不可
恃當高城浚池以為備復考陂七門堰農政用修免

責屬邑坊場河渡羨錢百姓德之以父憂去服闋起知鄂州適南市火善俊亟往視事弛竹木稅發粟振民開古溝創火巷以絕後患僚屬爭言用度將不足善俊曰吾將瘠己肥人乃省燕游車騎鼓吹之費郡計用饒代輸民役錢再知建州歲饑民群趨富家發其廩監司議調兵掩捕善俊曰是趣亂也諭許自新平米價民乃定邑尉入盜十三人死罪以希賞善俊辨其寃徙知隆興府移江西轉運副使時朝廷議減月椿錢善俊言及州不及縣則縣仍迫取於民猶不減也宜一路通裁其額下之漕臣科郡縣輕重均減

之又奏和買已是白科從而折變益加糜費其數反重於正絹併乞蠲減黥卒遇赦還者刺充鋪兵可除民害所言多見用轉湖南帥郴桂地絕遠守多非才善俊謂宜精其選代輸潭州經總制錢停醴陵渌水渡錢加秘閣脩撰移知鎮江府丁母憂終喪而卒年六十四善俊風儀秀整喜功名尤好論事孝宗時日中有黑子地屢震每以飭邊備為戒孝宗英武獨運缺相者累年善俊極言相位不可無人尤人所難言者

善譽字靜之父不倚太宗之後也善譽幼敏慧力學

乾道五年試禮部第一初調昌國簿攝邑事勸編戶
哀金買田以助嫁娶喪塋捕得海盜全黨守欲上其
功善譽曰奈何以人命希賞守益賢之薦于朝授兩
浙運幹改知撫州臨川縣縣嘗預借民賦善譽閱籍
發逋負按籍征催卒以時辦集遂罷預借改常州添
差通判史浩言其賢詔赴部堂審察累遷大理丞湖
北常平茶鹽提舉會大旱善譽通融諸郡常平計戶
振貸嗣歲麥禾倍收民爭負以償奏罷稅場十餘渡
四十五民便之俾諸郡售田委郡文學董其入以給
計偕者移潼川路提刑轉運判官遂寧守徐詡乏廉

聲部使者以其故御史寬假之善譽過遂寧詡出迎
善譽抑使循廊詡大沮郡人聞之爭訟其過善譽劾
諸朝宰相王淮善詡寢其章善譽徑以聞罷詡又以
羨貲給諸郡置莊民生子及娠者俱給米威惠並孚
宗子寓蜀者少業儒善譽即郡庠立學以教之人始
感勵引年乞祠歸處一室以圖書自娛無疾而卒年
四十七時淳熙十六年也善譽早失怙恃撫育諸季
備至居官廉靖自將多所著述郭雍朱熹嘗取其易
說云

汝述字明可太宗八世孫曾祖士說從二帝北遷臨

河罵敵而死汝述登淳熙十一年進士第調南劍州
順昌尉嘉定六年詔主管官告院自是常兼宰士累
遷將作少監權侍立脩注官八年除起居郎兼密院
都承旨俄遷兵部侍郎以母憂去服闋改刑部侍郎
遷尚書知平江府卒汝述為尉應詔上封事論議懇
惻立朝薦引多知名之士然為時相所親躡躋通顯
人亦以此少之

叔近悼王元孫榮良公克類之子也建炎元年為秀
州守杭卒陳通反詔辛道宗將西兵討之兵潰為亂
抵秀州城下叔近棄城諭以禍福亂兵乃去未幾差

權兩浙提刑叔近招通通聽命叔近以素隊數十人入賊城衆猶不解甲叔近置酒推誠待之遂皆感服城中稍定叔近奏通初無叛心止緣葉夢得賞不時給遂至紛爭今已就招請赦其徒二百餘人帝許之臺諫皆言不可遂寢叔近還秀州已而王淵兵至抗詐傳呼云趙秀州來通郊迎淵遂誅之初淵在汴京狎娼周氏周氏後歸叔近淵街之乃誣叔近通賊奪職拘于州以朱芾代之芾肆殘虐軍民怨憤小卒徐明率衆囚芾迎叔近領郡事叔近不得辭因撫定之請擇守于朝奏未達朝廷命張俊致討俊淵部曲也

辭行淵謂之曰叔近在彼俊諭意領兵至郡叔近出迎俊叱令置對方操筆群刀遽前斷其右臂叔近呼曰我宗室也俊曰汝既從賊何云宗室語未竟已折首于地徐明等見叔近死遂反戈嬰城縱火驅掠翌日俊斬關入捕明等誅之取周氏歸于淵紹興九年御史言叔近之冤贈集英殿脩撰

叔向魏王之系也方汴京破時叔向潛出之京西金人退引衆屯青城入至都堂叱王時雍等速歸政置救駕義兵其後為部將于渙上變告叔向謀為亂詔劉光世捕誅之

彥倅字安鄉彭城侯叔聚曾孫也父公廣饒州太守
彥倅初調溧陽尉邑民潘氏兄弟橫邑中號三虎畜
僮僕數百邑官莫敢誰何彥倅白其守治之縛潘氏
昆弟正其罪改揚州司戶攝獄掾有告主藏吏屢錢
餘千萬治之急吏泣請死彥倅察其情屏人問則諸
吏共貸也乃許自首免罪一日而畢改平江府推官
攝宜興縣縣自中興後預借民明年稅民挾此得慢
其令彥倅請禁預借邑遂易治知臨安於潛縣胥
往往通豪者吏得肆其奸彥倅執其黠者械送府臺
省吏從中救之彥倅力爭竟抵胥罪浮橋屢以水敗

彥倓梁以石民免溺死陞臨安府通判開禧初知興國軍歲旱蝗而軍需益急屬邑令吳格負上供銀尤多彥倓坐累貶秩格愧謝彥倓曰屬時多艱宜寬民力以崇根本何謝為潰卒據外城為變彥倓募能斬捕者賞之既而各斬首以獻散其餘黨累遷湖南運判徃人羅孟傳反累歲不能平彥倓謂帥臣曰徃人讐殺乃其常情況主斷不平是激之使叛也能遣謀者離其黨與俾還自相讐破之易矣帥從其計遂降孟傳尋知紹興府楮價輕彥倓權以法民便之復鹿鳴禮置興賢莊以資其費築捍海石塘亦置莊以備

增築會旱饑民聚陂湖中彥俟取死囚羣首刖足徇
於衆曰此劫掠竊者也遂散其衆乃第民高下損其
稅有差免輸湖籍田米舉緡錢四十萬以助荒政民
賴以濟詔改太府少卿遷顯謨閣知太平州調江西
轉運使嘉定十一年卒于官年六十四

彥櫛字文長悼王七世孫祖訓之在忠義傳彥櫛登
乾道二年進士第尉樂清會大旱令循故事禱雨而
責租益急彥櫛曰損歛已責所以招和氣何禱為已
而果雨累官福建路運幹屬邑負振鹽本錢數千萬
累歲不能償彥櫛白其長蠲之慶元初知晉陵縣歲

饑彥橐振恤有方所活幾二十萬又以羨錢為五等戶代輸擢監登聞檢院時韓侂冑方柄用朝士悉趨其門彥橐切歎惋出知汀州州民葉姓者嘯聚汀贛間彥橐遣將捕戮之遷廣西提刑諸郡鬻官鹽取息之六以奉漕司後增至八分彥橐復其舊以蘇民力朝廷從之侂冑死詔戶部侍郎兼樞密院檢詳士大夫前與兵議者坐侂冑黨將併逐之彥橐歎曰士方以偽學廢今又以兵端斥去苟欲錮士何患無名每見帝必言才難遷湖廣總領舊士卒物故大將不落其籍而私其月請彥橐置別籍稽核之或傳軍中有

怨言彥橐曰不樂者主帥耳何損士卒持之三年掛
虛籍者贏三萬額減錢百萬緡用度以饒比去餘七
百萬而諸路累積逋負猶四百萬盡蠲之知平江府
郡之昆山並大海盜出沒莫可蹤迹彥橐奏分其半
置嘉定縣屯兵以守轉寶謨閣待制卒于官年七十

一

彥逾字德先魏悼王後崇簡國公叔寓曾孫也紹興
三十年登第淳熙五年知秀州累遷大府少卿四川
總領將入境利西帥吳挺遣屬吏安丙來迓彥逾見
即喜其人從容問之曰太尉統衆六萬得無虛籍乎

丙以情告彥逾遺挺書俾損虛籍數千以寬四川之
賦挺不敢隱改知鎮江府郡適旱饑彥逾節浮費發
粟振糴民賴以濟遷戶部侍郎工部尚書孝宗崩光
宗疾不能持喪樞密趙汝愚議請立嘉王為皇帝欲
倚殿帥郭杲為用遣中郎將范任告之杲不應時中
外洶洶彥逾見汝愚對泣汝愚密告以翊戴之議彥
逾大喜力贊其決郭杲嘗被誣彥逾為白于帝杲德
之遂馳告杲曰彥逾與樞密第能謀之耳太尉為國
虎臣當任其責杲未及對彥逾急責之杲許諾遂領
兵為衛寧宗即位汝愚謂彥逾曰我輩宗臣不當言

功會留正免相汝愚登右揆彥逾以端明殿學士出知建康兼江東安撫使未行改四川安撫制置使兼知成都府彥逾為政不擾蜀人便安之以定策勲累遷資政殿大學士嘉泰間知明州兼沿海制置使嘉定間乞祠以歸尋卒彥逾始與汝愚協濟大計冀汝愚引己共政及外除頗缺望乃疏當時名臣上之目為汝愚黨帝由是疑汝愚其兩入蜀皆有聲然吳氏世守武興兼利西安撫操重權吳挺卒朝廷用丘宗議併利西安撫於東路以革世將之弊而彥逾奏復利西安撫乃領以武帥其後吳曦因之以生變人以

是谷彥逾云

列傳卷第六

計十字

宋王伯卷六

孔
商
刊

列傳卷第七

宋史二百四十八

開府儀同三司上柱國錄軍國重事前書丞相兼樞密院事都總裁長脫等奉
勅修

公主

秦國大長公主

太祖六女

太宗七女

真宗二女

仁宗十三女

英宗四女

神宗十女

哲宗四女

徽宗三十四女

孝宗二女

光宗三女

魏惠獻王一女

寧宗一女

理宗一女

秦國大長公主太祖同母妹也初適米福德福德卒
太祖即位建隆元年封燕國長公主再適忠武軍節
度使高懷德賜第興寧坊開寶六年十月薨太祖臨
哭廢朝五日賜謚恭懿真宗追封大長公主元符三
年改秦國政和四年改封恭懿大長帝姬有姊一人
未笄而夭建隆三年追封陳國長公主元符改封荆
國大長公主政和改封恭獻大長帝姬

太祖六女申國成國永國三公主皆早亡

魏國大長公主開寶三年封昭慶公主下嫁左衛將

軍王承衍賜第景龍門外太宗即位進封鄭國淳化
元年改封秦國真宗至道三年進長公主大中祥符
元年薨賜謚賢肅元符改封魏國大長公主政和改
賢肅大長帝姬

魯國大長公主開寶五年封延慶公主下嫁左衛將
軍石保吉太宗即位進封許國淳化元年改晉國真
宗初進長公主大中祥符二年進大長公主薨賜謚
賢靖元符改封魯國政和改賢肅大長帝姬

陳國大長公主開寶五年封永慶公主下嫁右衛將
軍魏咸信太宗即位進封虢國淳化元年改齊國真

宗初進許國長公主咸平二年薨謚貞惠後改恭惠
景祐三年追封大長公主元符改封陳國政和改賢
惠大長帝姬

太宗七女長滕國公主早亡

徐國大長公主太平興國九年封蔡國下嫁左衛將
軍吳元扆淳化元年改魏國薨謚英惠至道三年追
封燕國長公主景祐三年進大長公主元符改徐國
政和改英惠大長帝姬

邠國大長公主太平興國七年為尼號員明大師八
年卒至道三年追封曹國長公主景祐三年進大長

公主元符改邠國

楊國大長公主至道三年封宣慈長公主咸平五年
進魯國下嫁左衛將軍柴宗慶賜第普寧坊宗慶禹
錫之孫帝命主以婦禮謁禹錫第歷徙韓魏徐福四
國仁宗立進鄧國大長公主明道二年薨進封晉國
謚和靖元符封揚國政和改和靖大長帝姬主性妬
宗慶無子以兄子為後

雍國大長公主至道三年封賢懿長公主咸平六年
下嫁右衛將軍王貽永進封鄭國賜第景德元年
薨謚懿順景祐三年追封大長公主皇祐三年改韓

字三六十六
國徽宗改封雍國政和改懿順大長帝姬

衛國大長公主至道三年封壽昌長公主大中祥符
二年進封陳國改吳國號報慈正覺大師改楚國又
改邠國天禧二年改建國乾興元年封申國大長公
主天聖二年薨賜謚慈明徽宗改衛國政和改慈明
大長帝姬

荆國大長公主幼不好弄未嘗出房闥太宗嘗發寶
藏令諸女擇取之欲以觀其志主獨無所取真宗即
位封萬壽長公主改隨國下嫁駙馬都尉李遵勗舊
制選尚者降其父為兄弟行時遵勗父繼昌亡恙主

因繼昌生日以舅禮謁之帝聞密以兼衣寶帶噐幣助其為壽遵勗賓客皆一時賢士每燕集主必親視饗饔嘗有盜入主第帝命有司訊捕主請出所逮繫人以私錢募告者果得真盜法當死復請貰之歷封越宿鄂冀四國明道元年進魏國初遵勗出守許州暴得疾主亟欲馳視之左右白須奏得報乃可行主不待報而往從者裁五六人帝聞遽命內侍督諸縣邏兵以衛主車其後居夫喪衰麻未嘗去身服除不復御華麗嘗燕禁中帝親為簪花辭曰自誓不復為此久矣嘗因浴仆地傷右肱帝遣內侍責侍者主曰

早衰力弱不任步趨非左右之過由是悉得免主善
筆札喜圖史能為歌詩尤善女工之事嘗誡諸子以
忠義自守無恃吾以速悔尤視他子與已出均及病
目帝挾醫診視自后妃以下皆至第候問帝親舐其
目左右皆感泣帝亦悲慟曰先帝伯仲之籍十有四
人今獨存大主奈何嬰斯疾復顧問子孫所欲主曰
豈可以母病邀賞邪賚白金三千兩辭不受帝因謂
從臣曰大主之疾倘可移於朕亦所不避也主雖喪
明平居隱几冲淡自若誠諸子曰汝父遺令柩中無
藏金玉時衣數襲而已吾歿後當亦如是皇祐三年

薨年六十四帝臨奠輟視朝五日追封齊國大長公主謚獻穆徽宗改封荆國政和改獻穆大長帝姬真宗二女長惠國公主早亡

昇國大長公主初入道明道二年封衛國長公主號清虛靈照大師慶曆七年追封魯國謚昭懷徽宗改封昇國大長公主政和改昭懷大長帝姬

仁宗十三女徐國鄧國鎮國楚國商國會國唐國陳國豫國九公主皆早亡

周陳國大長公主帝長女也寶元二年封福康嘉祐二年進封充國主幼警慧性純孝帝嘗不豫主侍左

右徒跌籲天乞以身代帝隆愛之帝念章懿太后不
及享天下養故擇其兄子李瑋使尚主瑋朴陋與主
積不相能主中夜扣皇城門入訴瑋皇懼自劾諫官
王陶論宮門夜開乞繩治護衛御史又共論主第內
臣多不謹帝為黜都監梁懷一輩十餘人後數年不
復協詔出瑋於外主降封沂屏居內廷久之復召瑋
使為駙馬都尉如初英宗立進越國長公主神宗治
平四年進楚國大長公主熙寧三年薨年三十三以
瑋奉主無狀貶陳州輔臣議謚帝以主事仁祖孝命
曰莊孝追封秦國徽宗加周陳國政和改封莊孝明

懿大長帝姬

秦魯國賢穆明懿大長公主仁宗皇帝第十女也母
曰周貴妃嘉祐五年封慶壽進惠國治平四年進魯
國大長公主下嫁吳越忠懿王之曾孫右領軍衛大
將軍錢景臻改韓周燕國徽宗朝進秦魏兩國政和
三年更封令德景行大長帝姬靖康二年諸帝姬北
徙姬以先朝女金人不知留于汴建炎初復公主號
改封秦魯國避地南渡賊張遇掠其家中子愕被害
公主至揚州朝謁復避地之閩紹興三年自閩至會
稽請入見因留居焉後徙台州上以公主行尊年高

甚敬之每入內見必先揖靖康中戚里例納節至是
公主為其子忱請還舊官上以忱為瀘川節度使仍
詔戚里不得援例久之又為忱請優賜推恩上重違
之加忱開府儀同三司時主有三子恂愷非己所出
故獨厚於忱上戒之曰長主壽考如此乃仁宗皇帝
四十二年深仁厚澤是以鍾慶於長主長主待遇諸
子宜法仁宗用心之均一主感服薨年八十六上輟
朝五日幸其第臨奠詔子孫皆進官一等謚曰賢穆
二十九年加謚明懿

充國大長公主帝第十一女也嘉祐六年封永壽進

榮國長公主治平四年進祁國大長公主熙寧九年
改魯國下嫁左領軍衛大將軍曹詩主性儉節於池
臺苑囿一無所增飭十年夏旱曹族以主生日將盛
具為壽主曰上方損膳徹樂吾何心能安悉屏之元
豐六年薨年二十四追封荆國謚賢懿遷其二子曄
攸皆領團練使徽宗追封充國又改賢懿恭穆大長
帝姬

燕舒國大長公主帝第十二女也嘉祐六年封寶壽
八年進封順國長公主治平四年進冀國大長公主
元豐五年改魏國下嫁開州團練使郭獻卿八年進

三百六十七
楚國徽宗改吳國進吳越國改秦交國政和二年薨
追封燕舒國謚懿穆復改懿穆大長帝姬

英宗四女舒國公主早亡

魏楚國大長公主帝長女嘉祐八年封德寧治平三
年進封徐國下嫁左衛將軍王師約四年進陳國長
公主元豐八年薨追封燕國大長公主謚惠和元祐
四年追封秦國徽宗追封魏國加韓魏國改魏楚國
又改惠和大長帝姬

魏國大長公主帝第二女母曰宣仁聖烈皇后嘉祐
八年封寶安公主神宗立進舒國長公主改蜀國下

嫁左衛將軍王詵詵母盧寡居主處之近舍日致膳羞盧病自和湯劑以進帝厚於姊妹故主第池藥服翫極其華縟主以不得日侍宣仁於寶慈宮居常悵然間遇旱暵帝降損以禱主亦如之曰我奉賜皆出公上固應同其休戚帝居慈聖光獻皇后喪毀甚主曰吾與上同體視此亦復何聊立散遣歌舞三十輩元豐三年病篤主性不妬忌王詵以是自恣嘗貶官至是帝命還詵官以慰主意太后臨問已不省后慟哭久稍能言自訴必不起相持而泣帝繼至自為診脉親持粥食之主強為帝盡食賜金帛六千且問所

須但謝復詵官而已明日薨年三十帝未上食即駕
往望第門而哭輟朝五日追封越國謚賢惠後進封
大長公主累改秦荆魏三國主好讀古文章喜筆札
賙恤族黨中外稱賢詵不矜細行至與妾姦主旁妾
數抵戾主薨後乳母訴之帝命窮治杖八妾以配兵
既葬謫詵均州子彥弼生三歲卒

韓魏國大長公主帝第三女與魏國同生始封壽康
公主改祁國衛國下嫁張敖禮進冀國大長公主改
秦越楚國加今封政和三年改賢德懿行帝姬宣和
五年薨

神宗十女楚國鄆國潞國邢國邠國兗國六公主皆早薨

周國長公主帝長女也母曰欽聖憲肅皇后封延禧公主生而警悟自羈紲習嗜宛如成人年十二卒帝后皆變服哀送追贈燕國元符末改封周國

唐國長公主帝第三女也始封淑壽公主初帝念韓琦功德欲與為婚姻故哲宗緣先帝意以主降琦之子嘉彥歷封溫曹冀雍越燕六國政和元年薨追封唐國長公主

潭國賢孝長公主帝第四女也母曰宋貴妃始封康

國紹聖四年下嫁王遇歷韓魯陳鄆四國大觀二年薨追加封謚

徐國長公主帝幼女也母曰欽成皇后始封慶國進益冀蜀徐四國年及笄猶處聖瑞宮侍母疾晝夜不暫去藥餌非經手弗以進迨疾革號慟屢絕左右不忍視崇寧三年下嫁鄭王潘美之曾孫意事姑脩婦道潘故大族夫黨數千百人賓接皆盡禮無裏外言志向冲淡服玩不為紛華歲時簡嬉遊十年間惟一適西池而已再生子不成而死媵妾得女拊視如已出政和三年改稱柔惠帝姬五年薨年三十一追封

賢靜長帝姬

哲宗四女鄧國揚國二公主早亡

陳國公主始封德康公主進瀛國榮國大觀四年下嫁石端禮徙陳國改淑和帝姬政和七年薨

秦國康懿長公主帝第三女也始封康懿進嘉國慶國政和二年改韓國公主出降潘正夫改淑慎帝姬靖康末與賢德懿行大長公主俱以先朝女留于汴建炎初復公主號改封吳國觀上于越以王管筆小玉山奇畫為獻上溫辭卻之避地至婺州紹興四年入見其子堯卿等五人各進官一等主奏言祖宗以

來駙馬都尉石保吉魏咸信柴宗慶皆除使相今正夫歷事四朝在汴京曾建議迎陛下至杭州又言禁衛未集預宜防變乞除開府上不許八年再入見留宮中三日時極暑上每正衣冠對之飲食又為正夫求恩數上曰官爵豈可私與人況今日多事未暇及此時趙鼎當國方論群臣紹述之奸頗抑正夫鼎去位正夫始得開府之命給事中劉一正言其非舊制恐援例者多乃詔哲宗惟正夫為近親餘人毋得援例顯仁太后歸主同秦魯國大長公主迎于道十九年又入朝子長卿粹卿端卿皆自團練使陞觀察使從

所請也孝宗即位進封秦國大長公主隆興二年

薨謚

康懿主在日正夫官至少傅封和國公溫卿寧國軍承宣使長卿寧江軍承宣使端卿昭信軍承宣使清卿容州觀察使墨卿才卿並帶團練使其盛如此正夫薨於紹興二十二年贈太傅

徽宗三十四女政和三年改公主號為帝姬國號易以美名二字

嘉德帝姬建中靖國元年六月封德慶公主改封嘉福尋改號帝姬再封嘉德下嫁左衛將軍曹夬

榮德帝姬初封永慶公主改封榮福尋改號帝姬再

封榮德下嫁左衛將軍曹晟

順淑帝姬初封順慶公主薨追謚益國及改帝姬號
追封順淑

安德帝姬初封淑慶公主改封安福尋改號帝姬再
封安德下嫁左衛將軍宋邦光

茂德帝姬初封延慶公主改封康福尋改號帝姬再
封茂德下嫁宣和殿待制蔡偉

壽淑帝姬初封壽慶公主薨追封豫國及改帝姬號
追封壽淑

惠淑帝姬初封惠慶公主薨追封鄧國及改帝姬號

追封惠淑

安淑帝姬初封安慶公主改封隆福薨追封蜀國及改帝姬號追封安淑

崇德帝姬初封和慶公主改封崇福尋改帝姬號下嫁左衛將軍曹湜再封崇德宣和二年薨

康淑帝姬初封康慶公主改封承福薨追封商國及改帝姬號追封康淑

榮淑帝姬初封崇慶公主改封懿福薨追封蔡國及改帝姬號追封榮淑

保淑帝姬初封保慶公主薨追封魯國及改帝姬號

追封保淑

成德帝姬初封昌福公主改號帝姬再封成德下嫁

向子房

洵德帝姬初封衍國公主改號帝姬尋改封洵德下

嫁田丕

悼穆帝姬初封徽福公主改號帝姬薨追封悼穆

顯德帝姬初封顯福公主改號帝姬尋改封顯德下

嫁劉文彥

熙淑帝姬初封熙福公主薨追封華國及改帝姬追

封熙淑

敦淑帝姬初封壽福公主薨追封涇國及改帝姬追封敦淑

順德帝姬初封順德公主改號帝姬尋改封順德下嫁向子辰

柔福帝姬初封柔福公主後改帝姬

申福帝姬初封薨追封冲慧

寧福帝姬政和四年封

保福帝姬追封莊懿

賢福帝姬追封冲懿

仁福帝姬追封順穆

和福帝姬

永福帝姬

惠福帝姬

令福帝姬

華福帝姬

慶福帝姬

儀福帝姬

純福帝姬

恭福帝姬

右三十四帝姬早亡者十四人餘皆北遷獨恭

福帝姬生纔周睟金人不知故不行建炎三年
薨封隋國公主安德帝姬有遺女一人後適嗣
秀王伯圭封秦國夫人榮德帝姬至燕京駙馬
曹晟卒改適習古國王紹興中有商人妻易氏
者在劉超軍中見內人言宮禁事遂自稱榮德
帝姬鎮撫使解潛送至行在遣內夫人驗之詐
付大理寺獄成詔杖死又有開封尼李靜善者
內人言其貌似柔福靜善即自稱柔福蘄州兵
馬鈐轄韓世清送至行在遣內侍馮益等驗視
遂封福國長公主適永州防禦使高世榮其後

內人從顯仁太后歸言其妄送法寺治之內侍
李愔自北還又言柔福在五國城適徐還而薨
靜善遂伏誅柔福薨在紹興十一年從梓宮來
者以其骨至葬之追封和國長公主

孝宗二女長嘉國公主紹興二十四年封碩人進永
嘉郡主三十二年卒詔以醫官李師克等屬吏孝宗
時居東宮奏臣女幼而多疾不宜罪醫遂寢乾道二
年贈嘉國公主次女生五月而夭未及封

文安郡主光宗長女也次女封和政郡主季女封齊
安郡主皆早卒紹熙元年並追贈公主

安康郡主魏惠獻王女也初封永寧郡主改封通義以父遺表遂升安康歸殿前司前軍統領羅忠信子良臣詔王府主管鄧從義諭旨皇女孫郡主宜執婦道務成肅雍之德毋敢或違賜甲第居之良臣以恩轉秉義郎除閤門祗候官開禧元年郡主薨年三十九

祁國公主寧宗女也生六月而薨追封祁國

周漢國公主理宗女也母賈貴妃早薨帝無子

公主生而甚鍾愛初封瑞國公主改昇國開慶初公主年及笄詔議選尚宰臣請用唐太宗下降士人故

事欲以進士第一人尚主遂取周震炎廷謝曰公主適從屏內窺見意頗不懌帝微知之景定二年四月帝以楊太后擁立功乃選太后姪孫鎮尚主擢鎮右領軍衛將軍駙馬都統進封公主為周國公主帝欲時時見之乃為主起第嘉會門飛樓閣道密邇宮苑帝常御小輦從宮人過公主第特賜董役官減三年磨勘工匠犒賞有差明年進封周漢國公主拜鎮慶遠軍承宣使鎮宗族娣姒皆推官加封寵異甚渥七月主病有烏九首大如箕集主家搗衣石上是夕薨年二十二無子帝哭之甚哀謚端孝鎮官節度使云

列傳卷第七

[General Information]

□□ = □□□□□□□ □□ 74

□□ = □□□□□□□□

□□ = 171

□□□ = □□□□□

□□□□ = 1937

SS□ = 12460429

DX□ = 000007545635

url = http: // book2. du
xiu. com/ search? &cha
nnel = search > tag = &s
w = %B0%D9%F1%C4%B1%B
E%B6%FE%CA%AE%CB%C4
%CA%B7++%CB%CE%CA%B
7++74 &year = § year
= &seb = 0 &pid = 0 &show
c = 0 &fenlei ID = &Pages
= 1 &search type = 1